

DISSERTATIONES  
MEDICO-PHYSICÆ.

*De Austris Lethiferis.*

*De Montis Vesuvii Incendio.*

*De Stupendo Officium Cœli.*

*De Immensi Hypogæstrii Sarcomate.*

---

JOH. OB. ENRIK DO CONNOR M. D.  
Serenissimi Poloniz Regis Medico e Regia  
Cameræ Parisiensis Societate.

---



O X O N I I,  
E THEATRO SHELDONIANO,  
Sumptibus Henrici Christi Bibliopolæ An. Dom. 1695.

DISSEMINATIONES  
MEDICOPHYSICAE


Imprimatur,



*Timo. Halton*

PROVICE-CAN. OXON.

Jun. 7. A. D. 1695.



O X O N I A

E THEATRO SHELDONIANO  
Samuel Harris Esq. Librarian. An. Dom. 1697.





ANTRIS LETHIFERIS

DISSERTATIO  
MEDICO-PHYSICA

*In quâ diversæ antrorum feralium species,  
diversi saviendi modi, & Venenorum  
natura, explicantur.*

4 B h

**A** Nunc nunc Britannia, Vir  
Societatis, cuius patriam  
et Physicam hanc Tra-  
ctationem inscribamus. Tamen  
dum enim talem præstat Occa-  
sionem.



EXCELLEN  
T  
ANTHONY LEITCHFIELD  
COMM  
D I S S E R T A T I O  
MONTICOMERY  
MEDICOPHYSICA  
PRIVAT  
In quibus diversis antiquis fossilium species  
quibus fossilium montis & Venetorum  
naturae explicantur.  
E SUPPLEMENTUM  
JUSTITIAE

A  
Nomen non habet  
Nobilitas, cum patet  
non Physicum habere Tra  
Status imperatorum; Jamque  
dum enim talis venator Occa  
fiorum.

[L 1]

*Excellentissimo & Nobilissimo*

VIRO

THOMÆ

Comiti PEMBROCHIÆ

ET

MONTISGOMMERICI,

Baroni HERBERTO CARDIFFÆ &c.

PRIVATI SIGILLI ANGLIÆ

CUSTODI,

Nec non

ESUPREMIS REGNI

JUSTITIARIIS &c.

**A** Nimo non hærebam, Vir  
Nobilissime, cujus patroci-  
nio Physicum huncce Tra-  
ctatum inscriberem; Jamdu-  
dum enim talem venabar Occa-  
sionem,



sionem, ut ostenderem quanto ho-  
 nore & animi Obsequio antiquis-  
 simum Tuum Nomen, Tuaque ip-  
 sus Merita venerabar. Profun-  
 dissimam Tui Ingenii & perspicacis-  
 simam in Re Politica Judicii Fama  
 non solum per totam latè Britan-  
 niam meritò triumphat, sed etiam  
 ad remotissimas diffluit Regiones,  
 quousque acutissimus Johannes Loc-  
 kius, & Johannes Clericus, duo  
 Seculi Nostri Ornamenta, sua pro-  
 mulgarunt Opera. Majus autem  
 tanti Ingenii Argumentum afferri  
 non potest quàm summum Hono-  
 rum Fastigium, ad quod TE nuper  
 Rex sapientissimus, Gulielmus Ter-  
 tius evexit; Qui in Belgicam pro-  
 fectus Expeditionem, ut domi  
 suis, & Totius Regni Rebus tu-  
 tus consulere, ut communibus Po-  
 puli Votis responderet, & ut Tuis  
 Meritis plenius faveret, TE in-  
 ter



*ter Septem Summos Gubernatores,  
Quibus Imperii Britannici Habe-  
nas cum Regiâ Potestate commi-  
sit, Supremum Rerum Admini-  
stratorem creare dignatus est. Li-  
terati igitur Viri, ut debito mu-  
nere ritè fungantur, totam nunc  
curam & studium obnixè inten-  
dere deberent, ut Animum Tuum,  
Publicis Totius Regni Negotiis im-  
plicatum, identidem Suis recrea-  
rent Lucubrationibus. Quare Ego,  
Vir Illustrissime, Dissertationem  
Hancce, quantulacunque est, Tan-  
to Nomini offerre & dicare volui,*

*Excellentiæ Vestræ  
Inclytissimæ*

*Humillimus &*

*devotissimus Servus*

**BERNARDUS CONNOR.**

BERNARDUS COMPTON.



## LECTORI

S.

CUM in Italia Neapolitanæ cujusdam Cavernæ in extinguendis animalibus & facibus accensis occultam, efficacem tamen, vim observarem; cumque feralis hujus virtutis venenosi cujusvis halitus (ut hætenus creditum est) effectum esse suspicari non possem, Rei Historiam & meam de tam Stupendo Phænomeno sententiam tradere statui; quod ut plenius & luculentius exequar, aliorum quoque Antro-  
rum Lethiferorum naturam in *Operis Complementum* annectere congruum videbatur. Quare hîc omnes *feralium locorum* & *venenorum* species in unum quasi corpusculum congerere, tuoque, Lector Benevole, benigniori judicio submittere volui. His quoque *Novissimum Vesuvii Montis Incendium*, aliique duo de *Offificatione* & *Sarcomatis* Tractatus ex Gallico Idiomate traducti & quibusdam Animadversionibus Aucti accesserunt. Vive, Lector Candide, Valeque

B. C.

REPORT

Dr. Anne L. Johnson

1. The first of these is the fact that the  
 2. second of these is the fact that the  
 3. third of these is the fact that the  
 4. fourth of these is the fact that the  
 5. fifth of these is the fact that the  
 6. sixth of these is the fact that the  
 7. seventh of these is the fact that the  
 8. eighth of these is the fact that the  
 9. ninth of these is the fact that the  
 10. tenth of these is the fact that the

## *Errores Typographici.*

### **De Antris Lethiferis.**

**I**N toto hujus Codicis decursu occurrentia hinc inde Errata Lector pro benevolo dignetur judicio emendare. Ubi sententiam *Commate* inclusam videbit, ibi *Colon* vel *Semicolon* aliquando intelliget. Ubi *Colon* vel *Semicolon* reperiet, ea *Periodi* locum nonnunquam usurpasse existimet. Pag. 2. l. 14. pro *at* leg. &. pag. 3. l. 3. pro *minari* l. *minori*. pag. 21. l. 12. pro *virulenta* l. *virulentia*. pag. 25. l. 16. pro *nonnunquam* l. *nunquam*. pag. 26. l. 10. pro *objicetur* l. *objicietur*. pag. 27. l. 7. & 8. pro *sinle* l. *singula*. pag. 32. l. 5. pro *commixta* l. *commixta*. pag. 33. l. 22. & 23. pro *spatiosissimus* l. *spatiosissimis*. pag. 41. l. 8. pro *nationem* l. *rationem*. pag. 47. l. 24. pro *Arsenicali* l. *Arsenicalis*. pag. 54. l. 18. pro *sanè* l. *sana*. pag. 63. l. 2. pro *existimen* l. *existimem*. pag. 71. l. 21. pro *concavatis* l. *concavitas*. Sub finem Indicis pro *generandè* l. *generandæ*.

### **De Stupendo ossium Coalitu, & de Immani uteri Sarcomate.**

Pag. 5. l. 27. pro *Cimeterio* l. *Cæmeterio*. pag. 11. l. 12. dele *eas*. 23. Interrogationem transferas ad lin. 25. pag. 13. l. 16. & 17. pro *quantitat* l. *quantitate*. pag. 43. l. 14. pro *molam* l. *molem*. pag. 45. l. 3. pro *quam* l. *quem*. pag. 47. In titulo pro *Sarciter* l. *Sarcomate*.





VIRO CLARISSIMO  
BERNARDO CONNOR M. D.

JOHANNIS TERTII

Poloniarum Regis Medico,

è Regia Societate Parisiensi.

**H** Actenus eludens nostros Natura labores,  
Quos tulit in Gyros mortalia pectora,  
doctasque

Attrivit Mentis, dum vix Primordia rerum  
Fas libare, & pleno nondum attingere labro?  
Quin Tu per cæcos calles, tortosque Meandros  
Dux nobis Filum præbes; Tu proditor audax  
Naturæ, occultos penetras mira arte Recessus,  
Tota investigans Armamentaria Divæ.

Semina quæ foveant Incendia, quasque Vesuvius  
Intus alit flammæ; vi quali torqueat Ignes,  
Et Piceum late flumen, Spolia ampla liquatæ  
Rupis perruptique jugi, cum proxima quæque  
Ardens absorbet Gurges, everſaque secum  
Armentis fert Rura, & Flumine volvit eodem.

Quæ miranda parit Cumæa, & Nota Caverna  
Quos fert Ingressus. Hic atri Janua Ditis,

b 3

Osque

*Osque Erebi (Priscis formido) ; hic Ilia ducit  
Cerberus, & vocem pariter vitamque reponit.  
Hic certos inter Fines Mors clausa, Solutum  
Non agit Imperium ; Nec toto Regnat in Antro.*

*Hæc & plura Tibi. Tu quæ Pulmonibus instat  
Ingens tetepestas ; quibus undique viribus tæget  
Turbo doces, & quot Miscetur sanguine portis.  
Jam notum est quali fibræ, tennesque fibrillæ  
Nexu durescunt, & quo laxantur habenæ.*

*Ossibus at fixam Robur ; quæ immania Typhon  
Membra movens, iterum minitatur Prælia Divis.*

*Quæ Salibus diversa Acies, quanto Agmine factò  
Irrumpunt Hosti ; dum pars minus utilis Armis  
Aufugiunt, levibusque invadunt Æthera Pennis.  
Et quibus armatus telis, & Cuspide quali  
Sævus Mercurius ; qua tandem concitus Hasta  
Ductia rescindit non cauti Vulnere Amoris.*

*Corpore quas pariunt Hyemes, quos Corde tumultus  
Toxica, cum tandem lethali Empyricus Haustu  
Turget, Ventrisque ingenti sub Mole laborat  
Languidus, & tota Populum vix decipit Arte.*

*Eja ingens Pæon, iterum Tibi Præla laborent,  
Corporeamq; intus texturam, atque abdita Membra,  
Arcanosque Artus, fidis inscribere Tabellis.*

*Ne Nos jam lateat quis Corda micantia Motus  
Hæret, Quis Venas Salientes Circuit humor,  
Purpureique amnes, & nunquam devius Error.*

*Quin O ! Te Noltris longe complexibus arceat  
Invida Sors Nostri. Heu ! Te, per inhospita Saxa,  
Carpathiasque nives, & vinctum frigore Pontum,  
Nobis eripiunt querendi Nominis ardor,  
Et Regum Studia, & Fortes ( tua Cura ) Poloni.*

*At*



*At si Tu tristes Galene relinquis Athenas,  
 Non eadem pariter Nostras Oblivio Mentes  
 Obruet ; en animo semper Rhydicina Colendum  
 Nomen alet memori, meritosque indices Honores  
 Inclyta dum superest Cumææ fama Cavernæ ;  
 Dum Tuus, ex imo flagrantis Ventre Ruinas  
 Et Cineres rotat, & fumantia saxa, Vesevus.*

GUIL. BEAUCHAMP,

OXONII,  
 4 Jun. A. D. 1695.

A. B. & Coll. Nov. Soc.

SECRET

4306230107132A

THE

---

DE  
ANTRIS LETHIFERIS.

---

ARTICULUS PRIMUS.

*De Antris Lethiferis in genere.*

**T**OTA Terræ compages humani corporis fabricæ, vitâ & ratione exceptis, congruè satis comparari potest ; quemadmodum enim in humano corpore plurimæ solidæ ac fluidæ discrepantis naturæ partes reperiuntur, humores nempe varii in osseam contexturam, cartilagineam, membraneam, carneam, variasque id genus formas abeunt ; iidemque humores diversis fluidi, fermentationis, circulationis, transpirationis, secretionis motibus in nobis agitantur ; sic terra suis quoque visceribus, metallis, mineralibus, venis, fluidis aqueis, spiritibus, variis-  
A que



## 2 DE ANTRIS LETHIFERIS

que istiusmodi partibus gaudet, quibus humani corporis munia & motus imitari quodammodo videtur; diversi enim latices per telluris meatus & canaliculos jugi circuitu transeunt; iidem intestino & fermentativo motu in diversis terræ nidulis cientur, ibidemque in aurum, cuprum, sulphur, vitriolum, aliasque diversæ contexturæ substantias pro oblatâ matricis dispositione convertuntur; eadem fluida à centro terræ ad circumferentiam ejusdem sursum intestini motûs impetu evehuntur, ibidemque in vegetantium radices impingentia in plantas, at ex plantis in animalia, abeunt; vel si nullæ plantarum radices occurrant aut alia corpora in quorum oculis renitentiam reperiant hi vapores, aut si obviorum corporum renitentiam superent, cum patulo aere sese facile miscebunt, ubi, si nitro-sulphuræ indolis sint, in Tonitrua, Fulgura, Ignes Fatuos; vel, si aqueæ sint naturæ, in pluviam, nivem, nubes, aliaque id genus meteora, juxta repertam atmospheræ conditionem convertentur: unde patet totum telluris ambitum perenne esse spiraculum, per quem innumera diversæ naturæ effluvia, aquea, salina, sulphurea, imo mineralia à multis, imò cunctis terræ recessibus jugiter

jugiter exhalant, quæ nostram replent atmosphæram, illamque pro majori vel minori copiâ, pro salubri vel nocivâ qualitate densiorem vel tenuiorem, sanam vel perniciosam reddunt.

Sicut etiam corporis nostri habitus & pori nonnunquam ab ambiente frigore nimis constricti volitantia à corporis centro ad peripheriam miasmata non dimittunt, sed exitum illis præcludunt, & sicut eadem corpuscula à circumferentia ad centrum iterum quasi repersa, vel potius aliorum ponè sequentium exhalationem impediunt, inordinatos in corpore tumultus, intensiorem calorem, Febres, Pleuritidem, vasorum rixim, humorum meteorismum vel decubitum, hydropem, tussim ac varia id genus symptomata producant; sic quoque ab hyemali gelu constipatis telluris spiraculis subterranei vapores ab interiori terræ nucleo erumpentes per coarctatos strati exterioris hiatus foras iter sibi pandere non valent, unde deorsum quasi reverberantur, & in cavernis subterraneis tanquam *Receptaculis per descensum destillantur*, luctantque inter se & cum aliis quæ occurrunt mixtis hæterogeneis incunt, intestinum motum, vi fermentationis, acquirunt majorem,

#### 4 DE ANTRIS LETHIFERIS

jorem, æstuant, rarescunt, & nonnunquam pro intensiori motus gradu, & sulphurea materie natura impetuosè accenduntur; & inde, opinor, est, quod thermalium fontium scaturigines & loca subterranea calefiant magis in hyeme; & quod Terræ-motus, nec non Phlægreorum locorum incendia & eruptiones in hyemali vel verno tempore frequentius ut plurimum contingant quam in æstivo; in æstate enim terræ spiracula non tantum patula, sed & sensilibus rimis & crepaturis hiantia observantur, per quas effluvia quævis à terræ recessibus eructata libere & quasi pleno alveo exhalare possunt.

Quemadmodum pariter in humano corpore prostant filtra in quibus humores naturâ discrepantes fecternuntur, in his bilis, in illis saliva, in aliis urina, in quibusdam spiritus tenuissimi, in nonnullis lymphæ, in singulis diversa colatur materia, & sicut in nobis variæ acerrimi & aliquando corrosivi humoris minere generantur, uti spontanei Vomitus, Cholera morbus, Colica lancinans, Tormina, Rheumatismus, Arthritis, Ulcera varia, Ossium & Cartilaginum caries frequentissimè attestantur; sic Terra suis quoque colis, diversis humori-  
bus,



## ARTICULUS PRIMUS. S

bus, spiritibus, salinis particulis mitioribus, mordacibus, & causticis donatur; hic rivulis aqueis, illic acidulis, hinc fontibus thermalibus, illinc spiritu aluminoso, alibi vapore sulphureo, in quibusdam locis vitriolico, in nonnullis nitroso, armoniacali, arsenicali, sale Gemmeo & aliis istiusmodi corporibus imprægnatur; unde patet in terræ gremio fluida alia esse benigniora & proficua, alia verò noxia & virulenta, quæ omnia motu indito à terræ centro ad superficiem *sublimantur*, & in respectivis quæque locis in auras erumpunt, quæ deinde pro diversa indole & genuinâ proprietate diversos effectus præstitura sunt; alii enim vapores ad usum humanum inservient pluviam & fontes largituri; alii temperando aeri conducent, eumque respirationi magis idoneum efficient; alii denique deleteriâ quâdam & malignâ virtute sævientes aerem prorsus inquinabunt, & humani generis perniciem naturâ suâ molientur, de virulentis huiusmodi effluviis & laticibus hic loci agere, naturamque illorum fusius indagare animus est.

Notum igitur satis est in diversis Europæ locis & alibi terrarum varios reperiri meatus subterraneos & cavernas vel arte effossas

## 6 DE ANTRIS LETHIFERIS

aut à naturâ formatas ex quibus veneficus vapor emanat vel aura (Anglicè *damp*) quæ respirantia ibidem animalia suffocat, ferales hujusmodi cryptæ vulgò *Charoneæ scrobes* nuncupari solent ; quarum diversæ species recenseri possunt ; aliæ nempe cavernæ vapores acerrimos & sensiles Tartaream quandam Mephitim redolentes in notabili copiâ eructant, aliæ verò nullam auram, vapores nullos vel fumos ad sensum emittunt aut odorem, sed occulta quadam, efficaci tamen virtute grassantur : quædam aliæ sensim & sine sensu, & non nisi post plures horas aut dies extinguunt, aliæ verò subito & in uno horæ instanti ad mortem præcipitant ; aliæ denique animantia tantum trucidant, sed aliæ sunt quæ non animalia solum omnia, sed & accensas faces, & omnes cujusvis naturæ flammæ, non sine spectantium stupore, citissimè extinguunt ; inter eas verò scrobes quæ animalia simul & candelas enecant, aliæ sunt quæ spisso fumo aut vapore obfuscatae sunt, aliæ verò sine ullo prorsus vapore eundem effectum producant ; sed antequam ulterius de his disseramus, prius

Advertendum est eam fuisse hactenus medicorum opinionem, *Choroneas scrobes* & loca lethifera sensilem omnia, vel insen-

insensilem eructasse vaporem, vi cujus veneficâ immissa animalia & accensa funalia extinguiebant, difficile tamen haud erit demonstrare, quasdam esse scrobes in quibus animalia, & faces sponte emoriuntur, ubi nec minimum quidem virulenti vaporis aut feralis auræ indicium vel suspicio esse potest; sed antequam quidquam hac de re proponam, conveniam cum reliquis cryptas omnes in quibus animalia extinguuntur, & in quibus interim accensæ faces conservatâ flammâ ardent, virulento halitu sensili vel latente scatere: fateor pariter scrobes omnes denso fumo aut spisso vapore sensili obfusas, in quibus animalia simul & ignitæ candelæ pereunt, ex immodica effluviorum in aere volitantium copia & maligna forsân virtute hunc affectum præstare, uti arbitrantur; concedere tamen non audeo quod Cryptæ illæ lethiferæ, in quibus sine halitu aut fumo animalia simul & candelæ subitò extinguuntur, hunc fatalem effectum vi aut energia materiæ cujuscunque malignæ ex terra erumpentis aut in aere natantis producant; sed post serium & diuturnum tam abstrusæ materiæ scrutinium, verisimile mihi videtur quod animalia & faces in his locis tanquam in antlia pneumatica



## 8 DE ANTRIS LETHIFERIS &c.

matica ex solo materiæ respirationi idoneæ, aeris nempe elastici, defectu moriuntur: unde præter allatas superius mortiferarum scrobium divisiones, adhuc aptè dividendæ sunt in eas quæ materia verè virulenta & activa agunt, & in eas quæ sola materiæ laudabilis privatione occidunt, de his in decursu tractabimus, nunc verò de virulentarum naturâ sermo erit instituendus.

ARTI-

## ARTICULUS SECUNDUS.

*De Antrorum Feralium Virulenta materia.*

**E**X triplici elemento nostra coalescit atmosphæra, vero nempe aere, æthere, & exhalationibus; præcipuum autem & perenne atmosphæræ principium est ipse Aer, qui tenuibus, oblongis & elasticis, ut credibile est, floccis constat: hi flocci staminum instar lanceorum, ut elater ipsorum docet, cirrati sibi invicem incumbere & gravitare, censeri possunt, & juxta incumbentium atmosphæræ columnarum gravitatem aut levitatem condensantur vel rarefiunt: aer fluidi motum & raritatem ab æthere, densitatem verò & consistentiam ab exhalationibus mutuatur; æther vel luminosa atmosphæræ materia in *Lethiferis Cryptis* ex se aut vi insita mortem inferre non valet: Aerea pariter atmosphæræ filamenta animantium vitæ infensa esse non possunt; solæ igitur exhalationes ex *Antrorum* solo emergentes feralis hujus effectus causæ accu-

B

sandæ

sandæ sunt ; quum autem omnes exhalationum species lethiferæ non sint, ulterius investigare oportebit specificam *Virulentorum miasmaturam* naturam, quod ut ordine prosequar, uti jam antea aeris, ita nunc quoque telluris *analysis* quasi spagyrica præmittenda est.

Telluris globus ex mutuo solidarum & fluidarum partium conjugio resultat ; sub solidarum partium nomine veniunt metalla, mineralia, terræ minerales, & lapides (conchyliæ, trabes, arbores, ossa, & herbiformia corpora, quæ in terræ fodinis nonnunquam occurrunt, post diluvium adventitia sunt, nec terræ *Integrantes partes* nuncupari debent.) Fluidæ terræ partes sunt aqua simplex, marina, & mineralis, vel spiritus subterranei ex mineralibus oriundi ; nunc indagandum est de qua præcipuè telluris parte veneficæ exhalationes participare possunt : metalla, terræ minerales, & lapides nihil in se virulentum continere videntur : venenum enim subtile solet esse, penetrans, mobile, activum, acre, rigidis angulis vel spiculis hispidum, & quod præcipuum est, ab aliarum partium vinculo liberum ; principia verò & molecularæ metallorum, terrarum mineralium, & lapidum



## ARTICULUS SECUNDUS. II

lapidum arctissimo inter se nexu intertexta sunt, ad motum tarda, gravia, insipida, nullâ acrimoniâ aspera ; quare vapores cryptarum virulenti de metallis, terris mineralibus, aut lapidibus nihil prorsus participare possunt ; unde inter solidas telluris partes sola mineralia *Lethiferis particulis* aerem inquinare valent, & inter mineralia ea tantum quæ salina sunt vel sale acerrimo imprægnata.

Novi equidem varios authores qui mercuriales & antimoniales particulas virulentas esse credant, & pestium nec non morborum epidemicorum causas ab ipsis aliquando deducant ; nullius autem experientiæ aut rationis fulcro inniti videtur hæc opinio, cum videamus in hydrargyri & stibii fodiinis opifices sine noxâ aut vitæ dispendio degere ; cum pariter Mercurius & Antimonium in propria substantia, vel diversis modis chymicè præparata intus per os & alias vias in corpus intromittantur cum manifestis morbi, cui applicantur, levamine.

Opponet fortasse aliquis, quod mercurius, antimonium, aurum, cuprum, argentum & reliqua metalla sale possunt caustico in terræ penetralibus acui, eodem modo quo vulgò solent in Chymiâ aquis sty-

giis arte elaboratis imprægnari; ac proinde nihil impediet quo minus efferam veneni indolem induant hæc metalla, aeremque virulenta labe inficiant; ego quidem non dubito quin in terræ recessibus spiritus acidi corrosivi metalla & mineralia dissolvant, & quin post dissolutionem hæc metalla acutis dissolventis menstrui spiculis armentur, ut in artificiali solidiorum corporum ab aquis stygiis dissolutione contingit; haud inficior pariter hæc metalla salinis sui dissolventis spiculis acuminata corrosiva fieri & venefica; sed hæc feralis vis & energia non metallicis eorum partibus, sed salinis aculeis, quibus post dissolutionem horrescunt, attribuenda est; uti vulnus ab hastâ inflatum, non pali lignei, sed ferreæ, quâ armatur, cuspidis effectus est; sic lapis infernalis, aut mercurius sublimatus corrosivus, metallicis suæ Lunæ aut Mercurii moleculis carnes non dilaniant, sed acutissimis nitri aculeis, quibus echini cujusdam in modum in totâ suâ superficie undique hirsuti sunt: unde patet metalla omnia, mineralia, & lapides, si quem fortè perniciosum in corpore nostro effectum producant, id non virtute propriâ, sed vi associati cujusdam efferi salis, vel salini corporis præstare.

De

De veneni naturâ fusiùs inferiùs dicemus ; hic tantùm obiter advertere licebit quod venenosa quævis corpuscula ex mineralium, imò vegetantium & animantium regno desumpta in corpore nostro sui præcipuè salis virtute virulentiam exerunt ; sed hæ particulæ juxta diversas, quibus pollen, dotes, fixitatem nempe, volatilitatem, angulorum soliditatem & acutiem, sanguinem prætermodum coagulant vel dissolvunt, aut partium solidarum contextum corrodunt ; corrodentia verò salia aut salina corpora, etiamsi solidarum partium stamina divellant & dilanient, quia tamen paulatim agunt, tam citò mortem accelerare non valent ; unde in *charoneis cryptis*, in quibus subita vel cita mors invadit, suspicanda sunt tantum ea effluvia quæ subito inspissant nimis sanguinem vel attenuant ; ad hanc classem reduci tantùm possunt illi vapores qui de aluminis vel sulphuris, nitri, vitrioli, vel salis Gemmæ, arsenici vel salis armoniaci naturâ participant, aut saltem terreæ, metallicæ, aut minerales partes salinis hujusmodi stimulis acuminatæ : uterque autem salium mineralium spiritus & dissolvens & coagulans pro majori vel minori copiâ, pro majori vel minori tenuitate &



mobilitate seriùs aut citiùs, subito vel paulatim mortem accersent; si enim spiritus hicce paucus sit & in aere minutissimè divisus, postquam per inspirationem attractus est, non nisi sensum & sine sensu infestabit & irrepet; sic qui in fodinis laborant artifices, vel qui peste à miasmatis malignis in aere volitantibus corripuntur, primò in languores, mox in animi deliquium, tandem in summam virium jacturam cum imminente mortis periculo incidunt; unde non nisi post plures horas, imò dies nonnunquam, emoriuntur; si verò penetrantissima sit & tenuissima inimica hæcce aura, non tantum per pulmones beneficio respirationis, sed etiam per totum corporis habitum ad internos præcordiorum recessus permeabit, totamque corporis æconomiam subito evertet; quæ quando *Alkaline* indolis est, totam fibrosi sanguinis texturam penitus dissolvit & diffringit, ut sanguis ulterius fermentescere ac proinde circulari non valeat; quando verò *Acide* est naturæ, per summam coagulationis vim ita constringit, intricat, & alligat salina sanguinis principia, ita, inquam, congelat massam spiritus hicce frigidissimus, ut non tantum totum corpus enervatum extinguat, sed etiam singula

singula corporis membra immobilia & in tonico quasi motu ita rigida post mortem conservat, ut truncus, caput, & artus in eodem aliquando situ & positura post obitum permaneant, in qua ab hoc mortifero halitu erant correpta; præclarum hujus rei exemplum in Gallia ante aliquot annos contigit, quod quia stupendum simul & lepidum videbitur liceat hic loci attexere.

Industrii quidam fortunæ clientes Parisiis nuper rerum penuriâ coacti ad artem quandam, nescio quam, secretam refugerunt, qua occultos thesauros detegere se posse crediderunt; cellam quandam vinariam, in qua reconditum fuisse thesaurum existimarunt, proprium ad usum solito more conducunt, mox caveæ hujusce solum effodiunt; post horas aliquot ancilla herum vocatura in cellam descendit, atque herum reliquosque fossores, quos omnes primo aspectu operi intentos esse credidit, diu nequicquam vocatos, attonita surdos primò, mox Dæmone possessos ob avaritiam palàm exclamat: vagatur fama, accurrit populus, dein Magistratus; sed omnes hi fossores in mirabili quodam situ verè extincti reperti sunt; Ille qui ligone terram effoderat, & focius qui palà effossam terram  
remo-

removerat, ambo pedibus stabant quasi suis quisque operi affixus incubuisset; uxor unius quasi ab opere defessa in scamno, sollicito quodam vultu, sedebat, inclinato in palmam manûs genibus innitenti capite; puerulus laxatis braccis in margine excavatæ foveæ defixis in terram oculis alvum exonerabat; omnes in naturali situ, carnes tanquam statuas rigidi, apertis oculis & vultu vitam quasi respirante, exanimis stabant.

Nemini, ni fallor, dubium erit quin ex hac effossa tellure frigidissimus quidam & tenuissimus spiritus exhalaverit qui totum semel horum fossorum sanguinem subito pervasit, eumque ita in ipsis partium solidarum, musculorum præsertim, poris congelavit, quod fibræ fistulares carnes in toto corpore æqualiter concreto & immoto sanguine infarctæ fuerint, ac proinde æquali tensionis gradu in omnibus antagonisticis musculis contrahi debuerunt; unde necessarium est ut corpus in partibus posticis, anticis & lateralibus gravitatis & contractionis æquilibrium conservet; sicque cum directionis linea eidem horum cadaverum puncto respondeat cui ante eorundem obitum respondebat, non mirum quoque quod post mortem



mortem in eodem situ & positura persistant quo antè in vita extrema gaudebant.

Mirum nemini videbitur subtilissimum & acutissimum hujusmodi vaporem posse ita corpus undique penetrare, sanguinisque œconomiam evertere, cùm aura fulminea humana ossa intactis carnibus disrumpat, cùm gladium in vagina dissolvat, cùm vinum in dolio obturato cum fœcibus promiscuè confundat, cùm frigus hyemale aquam, aliosque liquores in cadis occlusis ad lapideam ferè soliditatem induret; cùm pariter experientia constet ab intenso frigore homines & bruta obrigescere; multoties enim mihi plures in Polonia asseruerunt quòd in magni Ducatûs Lithuaniae & Moscoviae, nec non Tartariae confiniis oves, vituli, & caprae ex pastorum incuria sub aere algido hyemali pernoctantes, à spirante acriter Borea ita infiguntur, obrigescunt, & congelantur, ut manè ante stabuli fores pedibus stare immobiles prorsus & exanimes reperiantur: in iisdem quoque, affirmant, Aquiloniis tractibus homines fœviente hyeme equitantes ab acutissimo frigore nonnunquam enecantur; membra autem eorum in ipsa morte ita rigida permanent quòd exangue corpus in equo sine ha-

benis per devia errante firmiter sedeat ; simile quid mihi Bruxellis in Belgio nuper narratum est à quodam Hispanici exercitus, ut vocant, Capitaneo ; ante biennium in Belgii & Galliæ limitibus, ardente tunc temporis præsentè bello, parva equitum Hispanorum manus ingruente hyeme per sylvas & rura pro more humanam, ut lex fert militaris, prædam venabatur ; horum unus à sociis incautè separatus diu solus sine duce per invia & ignota loca erravit, & tandem à summa frigidissimi aeris inclementia obriguit ; reliqui milites domum jam reversi metuunt ne in hostium manus deperditus inciderit socius, interim equus sine ullo regimine insidentem, cui timebant, militem ad solitum stabulum vehit ; adventum socii gratulantur, quem tamen nihil de erroris causa percontantibus respondentem, & diu fortiter succussum sine sensu & motu, & tandem sine vita extinctum reperiunt, cadaver gelu concretum & rigidum ab equo detrahunt.

Cæterum, mirum aded non videbitur cur acidissimi & tenuissimi subterranei vapores vel summum aeris frigus totum corpus rigidum & immobile reddant, cum videamus sine ullo prorsus effluvio terreo aut aeris rigore

gore homines quosdam ex summa mentis ad studium quodvis applicatione sine sensu & motu apparente tanquam inanimés stare, cum tanta tamen membrorum tensione & fortitudine, ut in eodem situ quo hac *Catalepsi* sunt correpti, libris vel chartis incumbentes permaneant; ante aliquot annos Monspelií hujus affectûs contigit exemplum; juvenis quidam Philiater studiosissimus libris in cubiculo affixus ad mensam repetitis vicibus, sed frustra, vocatur, ancilla nihil respondentem increpat, somno sopitum existimat, expergefaceré diu nequicquam tentat; tandem cum apertis oculis in librum, quem antea pervolvebat, defixis, in constanti situ permanentem observaret, perterrita mortuum exclamat; accersiti medici cum sequaci Philiatorum turba accurrunt, qui juvenem non mortuum penitus, sed in mortis vestibulo jacere, *Catalepsi* nempe *correptum* pronunciant; illum statim in pedes (totus enim erat corpore rigidus) elevant; nunc manum unam, mox pedem in aera attollunt, manus autem & pes sponte sua in aere pendent, mox hac manu & pede iterum in terram demissis, manum & pedem oppositi lateris in altum pariter levant, hi etiam artus sine fulcro, invita gravitate,



in hoc situ remanent ; sicque alternatim utrumque pedem levando & in terram deprimendo, juvenem, jucundo quodam spectaculo, larvæ cujusdam vel progressivæ statuæ in modum in cubiculo incedere cogebant ; frictionibus, pilorum avulsione, carniū vellicatione, cauterio igneo, volatiliū salinū & spirituum per os & nares exhibitione ad vitam tandem reducunt ; anno sequenti Monspelium veni, ubi recentissima adhuc viguit hujus symptomatis memoria : cū igitur in nobis ipsis sine ulla causā externa sed ex retardato sanguinis & fluidi animalis motu, & sensu spoliemur & motu, manentibus sponte sua in tonico motu membrīs, nil mirum erit quòd corpus à *ferali* externa *aurā* lacessitum ad ruinam citò præcipitetur.

Quicquid hactenus de virulenta *scrobium* materia dictum est, ad *Pestis* quoque naturam reduci potest ; pestiferum enim virus salinum est, & quando ex terræ effluviis ortum desumit de vitrioli vel aluminis, nitri vel sulphuris mineralis, salis armoniaci vel arsenici indole participat ; in sanguinem quoque eodem prorsus modo sævit quo sævire solent venefica *cryptarum feralium* miasmata, cum illo duntaxat discrimine, quòd  
hæc

hæc in determinato semper loco infestent, ac proinde minorem mortalium numerum e medio tollant, illud verò e sinu terræ copiosius ejectum, per urbes integras, provincias, & regna cum vehiculo aereo latius serpit, & cum majori hominum & brutorum strage triumphat; quoad cætera, fermentum *pestis*, non secus ac *Antrorum Charoneorum* virus, strictiori *coagulationis* vinculo sanguinis principia vel colligat, vel nimio *dissolutionis* fluore referat; unde hîc ulterius de *pestis* virulenta differere, foret eandem *cramben* recoquere; de ipsius quoque contagio inquirere extra præfixum scopum esse videtur; meum pariter hîc non erit perpendere, utrum jure vel præ vano tantum metûs præjudicio naves, quæ à regionibus Orientalibus peste ut plurimum infectis ad Oceani vel mediterranei maris portus post longum iter perveniunt, quadraginta diebus stare ante portûs fauces cogantur, donec collectum *pestis*, ut creditur, *seminium* à ventis dissipetur; nec animus est explorare utrum majoris prudentiæ argumentum est, has naves à littore pro quadraginta diebus procul remove, quàm foret ventos, quibus naves ad portum appulerunt, alto murorum aggere in

mare repellere: his igitur prætermiſſis ad rem revertor, & ad eam antrorum ſpeciem deſcendam, in quibus ex ſolo laudabilis aeris defectu animantia extinguntur.

Hic obiter obſervatu dignum videtur, quòd de illorum vita ſemper actum non eſt, qui ſiniſtro omine virulentis *ſcrobium* effluviis infecti ſunt, poſſunt enim, niſi ſtatim moriantur, remediis ex arte medica ritè depromptis, & citò adhibitis ad proſperam valetudinem reſtaurari, cum ea tamen perſpicacis medici cautela, ut ſine mora accerſitus obnixè ſcrutetur an inſpiratum venenum ſanguinem diſſolverit nimis aut coagulaverit, quod ſtatim ex tenuiori vel denſiori extracti ſanguinis conſiſtentia innoteſcet; ſi medicus ſanguinem in paropſide fluidum & minùs cohærentem, pulſum demiſſum & vix ſenſilem, hæmorrhagiam, ſumnamque virium jacturam obſervaverit, à remediis calidioribus, diaphoreticis, emeticis & attenuantibus abſtinebit, ſed juſculis, cardiacis mitioribus, julepis refrigerantibus, emulſionibus, & reliquis id genus increaſſantibus, attemperantibus, & corroborantibus remediis citò utetur; ſi verò extractum ſanguinem, tenacem



nacem & prætermodum coagulatum, pulsum paulò elatiorem sed lentum & quasi naturalem, aliqualem respirandi difficultatem, cum lipothymia & totius corporis debilitate viderit, emeticis benignioribus, cardiacis calidioribus, spiritibus & salibus animalium volatilibus, diaphoreticis & dissolventibus remediis incrassatum nimis sanguinem citissimè sed prudenter attenuare conabitur; cum eadem quoque cautela in *pestis* nec non *pestilentialium* & *malignarum februm* curatione procedendum est; *pestis* enim, ut suprà annotavi, & malignæ febres pro diversa auræ veneficæ aut fermenti febrilis natura nunc à dissolutione sanguinis, nunc à coagulatione ejusdem nimia dependent.

## ARTICULUS TERTIUS.

*De Antrorum Lethiferorum  
vaporosa materia.*

**U**TI salubris animantium respiratio ex debita aeris, ætheris, & exhalationum in atmosphaera miscela perficitur, sic eadem quoque ab irregulari eorundem proportione depravatur; hæc autem aeris intemperies in eo sita est vel quodd inspiratus aer virulentis miasmatis sit inquinatus, ut in præcedenti capite ostendimus; vel quodd nimia materiæ æthereæ copia sit rarefactus, ut inferius dicemus; vel quodd densa effluviolum innocuorum nube sit onustus; de lethiferis speluncis vaporoso hujusmodi & innocuo aere nimis imprægnatis hic loci discurrendum est.

Notum itaque satis est varias in Europa passim speluncas observari subterraneas, & mineras in quibus fuscus, crassus & torpidus aer inclusus est, & in illis animalia, quò magis ab antri vestibulo ad fundum gradatim procedunt, eo majorem respirandi difficultatem

ficulatem non sine suffocationis periculo experiuntur, & quo magis à fundo ad ingressum recedunt eo tutius respirant; faeces quoque accensæ in easdem cryptas pedetentim allatæ paulatim extinguuntur; in his autem cavernis nullum suspicari possumus venenum, quia statim atque animalia liberiori & tenuiori aere fruuntur, sponte sua reviviscunt; & quando ex opposita antri parte externo aeri alter ingressus aperitur (ut sæpe fit à fodinarum opificibus,) totum antrum statim eventilatnr, & duplici hocce spiraculo meabile evadit, quod antea uno ingressu fuit inaccessum. In his cavernis aer nullis ventis agitatus ac proinde ex antro nonnunquam expulsus torpescit, & crassescit, quia effluviis aqueis, salinis, & sulphureis è telluris nucleo jugiter eructatis indies imprægnatur; tam spissa aliquando sulphurearum particularum nube onustus est aer in hisce recessibus, quod appropinquatâ ardente candelâ nonnunquam accenditur, & adstantium vestes, capillos & vultum comburit; unde in respiratione veri & vitalis aeris quantitas ab innatantium vaporum prædominio superatur, ficque minor aeris quantitas inspiratur quàm ad vitam conservandam & propagandam requiritur;



tur ; qujeta pariter & densior eorundem vaporum moles erumpentibus accensæ facis scintillis nimis resistit, impetumque illarum retundit, ac proinde flammæ paulatim intercipit : hinc patet quòd in locis hisce reconditis non ex venefica ulla antrorum virtute sed ex defectu aeris à nimia vaporum miscela diminuti & veluti expulsi animalia & faces extinguuntur.

Mihi dubio procul objicetur quòd in *lethiferis* hujusmodi *foveis* sufficiens non deest aeris stagnantis quantitas, sed quod ex defectu motûs respirationi ineptus evadit, uti noster aer communis quando continuo montium jugo, vel alto murorum vallo undique obsessus est, imo quando in ipsa camporum planitie nullo ventorum flamine agitur, torpescit prætermodum & respirationi minus idoneus evadit ; uti pariter aqua quævis in vasis apertis aut vivariis diutius stagnans putrescit & humano usui valedicit ; hinc, reor, concludetur quod non ex defectu aeris in his antris animalia pereunt, sed quia ex defectu motûs aer ipse laudabili illa spoliatur qualitate, qua vitam inspiratus conservare solet : sed quænam, amabò, erit laudabilis illa qualitas qua aer ex defectu motûs exiit ? quid defectus

fectus motûs producere potest nisi quietem? quis autem aerem utpote semper fluidum unquam in quiete esse asseret?

Ut itaque opposito hujus argumenti obicitutius occurram advertere interim licebit duplicem esse in aere motum, *fluidi* nempe & *translationis*; *fluidi motus* ille est quo singulæ aeris filamentosæ particulæ, animalculorum instar, intestina quadam & insensibili fornicatione, sursum deorsum, dextrorsum sinistrorsum, antrorsum retrorsum, & in omnem loci differentiam jugiter agitantur; aeris autem *translationis motus* ille est quo non tantum exiles & minutissimæ, ut ita dicam, aeris *atomi*, sed etiam ampla totius massæ aeræ dimensio ab aere succedente vel potius ponè urgente ex occupato loco removetur, quo hinc in alium locum, & inde successivè in alium propellitur; hujusmodi motus in aere *Ventus* vulgò nuncupari solet: nunc igitur perpendendum an ex *fluidi* vel *translationis* motûs defectu aer in antris respirationi ineptus evadat; in aere autem, sive in meatibus subterraneis occlusus sit, sive patulæ atmospheræ sit expositus, *fluidi motus* nunquam deficit; hæc enim motûs species perennis est & indelebelis in fluidis omnibus, in aquis ipsis stagnantibus, in spiritibus,

ritibus, & in liquoribus quibuscunque, si-  
ve in obturatis, siue in apertis vasis conti-  
neantur; vel si fortè aliquando *fluidi motu*  
destituantur hi liquores, solidi statim corpo-  
ris formam induent; sic aqua, vinum, cer-  
visia in glaciem consolidantur; cùm verò  
aer solidi corporis duritiem nunquam ac-  
quirat, sed semper fluidus & meabilis sit, per-  
eun quoque *fluidi motu* agitur; totum igitur  
in hoc casu aeris vitium in *Translationis*  
motus defectu esse censebitur; quod ut ritè  
percipiatur,

Statuendum est quod motus & quies in se  
nihil revera sunt, sed sunt *externi* tantum  
corporum, prout à nobis considerantur, *re-  
spectus* vel *modi*; quamvis autem diver-  
sus huiusmodi *respectus* à nobis circa idem  
corpus nunc motum nunc quietum formetur,  
nihil reipsa diversum aut novum in hoc cor-  
pore indicat, quia nihil reipsa in corpore  
quovis concipi aut excogitari potest nisi cor-  
pus, nihilque corpori novum aut *reale*, ut  
vocant, accedere potest nisi materia, ac  
proinde motus quiescenti corpori aut quies  
moto corpori advenientes, cùm nihil reapse  
sint aut saltem nihil materiale, nihil corpo-  
ri novum addent & in ipso nihil intrinse-  
cum mutabunt, atque ita corpus in quiete  
positum



positum idem erit quod fuit antea in motu, & vice versa, eodemque modo afficere aptum est, modo aliqua motus specie stimuletur, juxta axioma, *Idem manens idem semper facit idem*; atque ita aer, cum semper *fluidi motu* gaudet, sive tumultuoso ventorum turbine agitetur, sive in *cryptis* subterraneis quietus torpescat, ejusdem semper naturæ est & conditionis, nihilque in ipsius substantia mutabitur nisi nova & heterogenea admisceatur materia quæ aeris texturam particularumque conjugium dissociet; hinc igitur videre est quod non præcisè ex defectu motus *translationis* in aere animalia unquam in antris mortiferis extinguuntur; quoniam patet quod defectus hujusmodi motus, aeris naturam mutare, pervertere, aut corrumpere non valet: cum tamen experientia doceat, in stagnante aere animalia non posse liberè respirare, aut vitâ frui, genuina hujus phœnomeni ratio ulterius indaganda est.

Eodem modo de torpescantis aeris corruptela ac de stagnantis aquæ putredine judicandum est; unde prius investigare opus est quare stagnans aqua turbida & insalubris est, aqua verò fluminis sana & pellucida observatur; quod non præcisè ex motu aut quie-

te provenire existimo, sed quia utraque aqua magis vel minus heterogeneis corpusculis oneratur ; supponamus igitur pellucidam fluvii cujusvis aquam per aquæductum in vivarium aut fossam datâ opera excavatam, donec impleatur, defluere, huicque aquæ exitum denegari ; turbida paulatim & insalubris evadere debet, non quia motum perdit, sed quia salia, quibus fossæ solum imprægnatum est, dissolvit & in suo sinu amplectitur ; præterea miasinatis è terra continuo exhalantibus inspissatur, variis quoque particulis in aere volitantibus inquinatur, & nitrosa incumbentis aeris salia dissolvit, & in suum gremium imbibit ; sic hac aquâ tot tantisque corpusculis ex terra & aere collectis & remanentibus indies oneratâ, pori ipsius directi, quibus pellucida antea apparebat, replentur ; ac proinde necessum est ut aqua opaca, falsa, gravis, putrida & insalubris evadat ; præterfluens verò fluminis aqua diaphana & salubris est, non reverà quia præterlabitur, sed quia alienis terræ & aeris fordibus minùs deturpatur ; dividamus igitur Rhenum, e. g. cum primum fluere cœperat in varias undas sibi statim succedentes ; prima unda alvei fordes superficie tantum tenuis quasi lambendo abluvit, secunda,

secunda, tertia & quarta melius absterferunt, & sequentes fluctus siquid ab antecedentibus immundum aut salinum relictum est, aut de novo ex alvei solo aut telluris spiraculis emersum, secum præcipiti torrentis cursu verrunt & ad hoc usque tempus ad mare devolvunt; unde fluvius limpido lactice nullâ immunditie turbido pellucere debet, non præcisè quia in motu est, sed quia, statuto ipsius motu, erumpentia ex terrâ, aut decidentia ex aere corpuscula in notabili copia accumulari, sibi occurrere, aut associari non possunt: quod si aqua in vasis & in navibus aliquando putrescat, id potius aquæ ipsius, aut vasorum ligneorum vel metallicorum salibus & sordibus quam motûs defectui attribuendum est; aqua enim pura & pura, nullis alienis particulis permixta, in vasis vitreis per plures annos, ut experientia probat, incorrupta conservatur.

Quod nunc de quieto & fluente aqua dictum est, idem quoque de agitato vel stagnante aere dici posse existimo; aer enim in specubus subterraneis occlusus vaporibus è terra emissis paulatim saturatur; illique vapores continuo accedentes in tanta tandem copia intra speluncarum parietes coacervantur



tur quod aeri majorem consistentiam conciliant & gravitatem, & comprehensum intra speluncas spatium *vaporesum* potius quam *aereum* reddunt; sicque aer & exhalationes simul commixtæ propriâ gravitate in fundo cryptarum detinentur; plus enim gravitare debent quam aer ad antri vestibulum superincumbens, ac proinde exitum sibi foras excudere non poterunt; quando igitur *fluidum* hocce *vaporesum*, præ gravitate semper in antro retentum, & novis indies effluviis imprægnatum à thorace inspiratur, eundem in sanguine effectum præstare non potest quem solet aer externus: ipse enim aer (nam aeris *nitrum* tanto operi impar esse videtur) in certâ & debitâ quantitate cum sanguine misceri debet, ut à calore ejusdem rarefactus sanguinem vicissim rarefaceret; quando autem spissi & copiosi vapores cum inspirato aere commixti sunt, ad porulos, per quos aer ex vesiculis pulmonum in sanguinem transire solet, statim appellant, eosdemque obstruunt, vel præ nimia quantitate aeræas particulas ad porulos appellentes removent, inde sanguis debitâ aeris portione depauperatur, ac proinde crassescit nimis, fermentatio ejusdem debilitatur paulatim, & tandem animal, nisi no-

vo & puriori aeri cito exponatur, exantlatis viribus extinguitur.

Mirabitur forsan aliquis quod omnes subterraneæ specus, anfractuosaæ præsertim & profundissimaæ, non sint ob allatam jam rationem mortiferaæ. Sed advertat, quæso, quod aer in quibusdam cryptis longè purior est & vaporibus minus sordidus quam in aliis; idque provenire videtur ex eo quod quædam speluncæ nullo omnino vento abluuntur, aliæ vero sensili aurâ nunc frigida nunc tepida leniter detergantur; uti in variis Europæ antris ipse vidi. In Regno Neapolitano ex immani Cumana Sibyllæ antro tenuem ventum effluentem percepi. Ex tortuosis cavernis ad Baiarum portum pro stutharum usu à Romanis olim excavatis tepidam auram spirantem persensi. In quibusdam Germaniæ fodinis præcipuè in mineris Halensibus Cæsareis in Comitatu Tyrolensifitis leni quodam flamine, placido veluti Zephyri refrigerio, gaudebam. In spatiosissimus salis fodinis Cracoviensibus in Polonia vento haud exiguo eram afflatus; ubi opifices, & ipse fodinæ dominus Andreas Morstin nobilis Polonus, mihi asseruerunt, quod tanta aliquando ventorum tempestas ex ambagiosis hujus fodinæ recessibus surge-

re solebat, quòd laborantes fossiores humi prosternebat, nec non portas & domicilia (quæ sibi in hac fodinâ artifices exstruunt) penitus evertibat. In omnibus igitur antris ex quibus ventus vel semper, vel certis temporis periodis spirare solet, animalia sine vitæ periculo degunt, quia in his aer ventis agitatus à vaporibus depurgatur, & fit animalium respirationi salubris.

Quando in animi deliquium in his antris opifices vel viatores incautè incidunt, præstò debent esse remedia quæ fatiscentes vires restaurare valent; cùm igitur hic vires deficiant quia ex defectu aeris, fermentatio sanguinis retunditur ac proinde circulatio ejusdem retardatur; ea exhiberi debent medicamenta quæ ipsius effervescentiam promovere & circuitum accelerare apta sunt; qualia sunt vini generosi haustus, juscum calidum, aqua vitæ, spiritus vini, aqua Regiæ Hungariæ, aqua Cinnamomi vel Theriacalis, confectio Hyacinthorum vel Theriaca in vino propinata, Elixir proprietatis, spiritus vel sal volatile animalium in jusculo, vino vel julepo cardiaco dissoluta; spiritus salis armoniaci naribus admovendus; situs corporis debet esse horizontalis, ut sanguis ad cerebrum faciliùs pro secernendis spi-



spiritibus proficiscatur. Si vero onus aliquod circa pectus aut respirandi difficultas percipiatur, phlebotomia celebranda est, ut cruori per pulmones & reliquum corpus circuituro via patefiat; si vero diutius lipothymia urgeat aut graviora superveniant symptomata, vino aut pulvere emetico labefacta corporis œconomia citò fuscitanda est.

## ARTICULUS QUARTUS.

*De feralium Antrorum Ætherea materia, cujus occasione integra cryptæ Neapolitanæ Historia hic attexitur.*

Quædam observari solent cavernæ in quibus sine ullo fumo aut vapore animalia & faces accensæ subito extinguuntur; in his locis nulla potest esse virulentæ materiæ suspicio, quoniam nulla venefica effluvia, præcipuè quando insensilia sunt, candelæ flammæ enecare valent. Vaporiosi pariter & innocui aeris effectus esse non potest, quoniam nulli apparent vapores; unde

ex materiæ æthereæ in his spatiis aerem nimis attenuantis redundantia procedere censendum est; quod ut evidentius probetur sequentem, quæ ad rem facit, *Neapolitanæ cryptæ* historiam, hic annectere congruum videtur; in hac enim scrobe animalia & candelæ pereunt, cujus effectus alia excogitari non potest causa, ut experientiæ & rationes inferius afferendæ luculenter docebunt, quàm elastici aeris ab æthereæ materiæ excessu expulsi defectus.

Neapoli profectus sum ad observandas naturales Stuphas, & Thermas Baiarum, Cummarum ruinas, nec non ignivomum montem, qui olim *Phlegæus* vel *Vulcanius* nunc ex collecto ibidem copioso sulphure (etiam alumine) ab Incolis *Solfaterra* vocatur. In medio ferè itinere incidi in exiguam sed antiquam *Cavernam* duobus circiter Italis miliaribus Neapoli distantem, quæ ex frequenti animantium interitu, & præsertim canicidio celebris est, unde ab Indigenis nuncupari solet, *la Grotta del Cane*. Hæc fovea in monticulo sita an à natura ibidem insculpta sit, an manu effossa dubitatur, sed perinde est; undecim circiter pedes longa est,

est, lata septem, alta novem; parietes hujus cryptæ duplicis coloris observantur, incipiendo ab area solo ad altitudinem decem circiter digitorum obscurioris coloris & quasi subviridescens in tota antri circumferentia discernuntur facile à superiorum parietum regione, qui nativum terræ colorem imitantur. Eiusdem pariter amplitudinis non est ubique, fauces sunt capaciores, fundus est angustior quasi in conum irregularem desiturus, facies superior est quasi concavata, pavimento seu area est plana horizontalis; appropinquata ad solum manu perferuntur calor modicus, & emittit fumosa aura tenuis quidem, sed sensilis. Hæc crypta feratâ porta occluditur ne pecudes in vicinia lumentes pascua, eam, si pateret, ingrediantur, & imminentis mortis periculum subeant.





- A. A. A. A. *Feralis Cavernæ facies & ingressus.*  
 B. B. B. B. *Altitudo spatii lethiferi & viri-  
 descentis muri coloris.*  
 C. C. *Æther subtilissimus & insensilis in  
 horizontali linea à toto antri  
 ambitu in cavitatem ejusdem in-  
 grediens.*  
 D. D. D. D. *Regio Cryptæ superior in qua ani-  
 mantia vitâ fruuntur.*

## ARTICULUS QUINTUS.

*De experimentis quæ in antro Neapolitano vulgo celebrari solent.*

EST quidam Rusticus hujus Cavernæ custodiæ ascriptus, qui nobis (uti solet reliquis viatoribus à quibus laboris fructum exigit) non sine stupore sequentia experimenta in hoc antro exhibuit. Canem vivum prehensis manu pedibus humi prostratum detinuit; & statim canis anhelus in convulsivos motus, mox in spasinum, tandem prostratis viribus in deliquium hiante ore moribundus decidit; luctantem jam cum morte & ferè exanimem, in adstantem lacum nomine *Agnanum* subito projecit, eminente supra undas capite, & canis à cardiaca hacce (ut creditur) aquâ, quasi ab hausto nectareo latice refectus ab Orci faucibus restauratur paulatim, & currit; percontatus sum an in aere solo relictus revivisceret, respondit Cryptophylax soli aquæ insitam fuisse virtutem domandi inspiratum venenum, imo sic existimabant omnes quos hanc

40 DE ANTRO NEAPOLITANO

hanc cryptam hæcenus observasse novi. Dein Cryptophylax accensum funale ad antri aream tulit, quod ictu oculi citius statim atque viridescentem muri lineam præterit extinguitur copiosum fumum spargens. Tota igitur hujus foveæ deleteria vis infra viridem muri circumferentiam duntaxat sævit; unde homines, oves, grandiores canes, & reliqua istiusmodi animalia quæ ex mole corporis vel crurum longitudine hujus lineæ altitudinem capite superant sine vitæ discrimine ibi respirare possunt; sed si animus est eadem suffocare, necessum est ut caput valida manu pressum viridem infra lineam invitum detineatur. Catuli verò, columbæ, gallinæ, mures & reliqua id genus animalcula semel in antrum projecta, sponte sua rupto statim vitæ stamine pereunt.

---

ARTICULUS SEXTUS.

*De meis in hoc Antro observatis.*

**F**Inita hacce tragica scena attonitus petii Puteolos & Baias, miratus maximè quid infra viridescentis foli sphaeram abd-  
tum



tum latitet, quod tam subitam & stupendam necem cani accersat ; quid in insipido *Agan-  
ni stagni* flumine antidotus in promptu sit, quod in mortis vestibulo languentem canem repentè refocillet, & quod magis animum torquebat, cur aer eundem effectum non præstaret. Tota itaque nocte insomnis mecum agitabam hujus rei nationem, sed nequicquam, concipere haud poteram quod tanta vi Alexipharmaca polleat hæc torpescens aqua ut solo sui contactu attractum (ut creditur) à cane venenum & jam per internos corporis recessus cum sanguine passim diffusum domare intus vel foras elutriare valeret ; imo etiamsi introducta intra canis corpus supponatur unda, quod difficile probabitur, quia caput illius extra undam eminebat, vix hunc mirum effectum saltem tam citò operabitur ; si enim per pharyngem in ventriculum decideret non nisi post longum tempus per solitam, & ambagiosam chyli semitam cum sanguine confunderetur ; vel si per laryngem in pulmones irrueret, tantum abest, ut cum sanguine misceretur, & sensus restitueret, quin imo pneumaticam tracheæ arteriæ fistulam irritando, tussim molestant, & ob-  
ruendo bronchiales vesiculas respirandi diffi-

F

cultatem

## 42 DE ANTRO NEAPOLITANO

cultatem cum vitæ periculo induceret. His deductus ratiociniis de antivenefica lacûs virtute dubitabam & aerem solum hac prærogativa donare coeperam.

Ut igitur tantæ caligini cæcus adhuc lucem aliquam afferam, quædam ibidem experimenta facturus postridie canem, felem, & duas columbas vivas cum bilance mecum portavi. Ill. D. Comites de Morstin pari indagandæ veritatis stimulo solliciti huc mecum accurrerunt. Propriis manibus apprehensam ex colombis unam in antri area detinui, & jam colluctantibus vita & morte, languentem, & tantum non mortuam soli aeri, virtutem illius experturus exposui; & hæc columba evanescentem vitæ flammulam recuperat sensim volatura è manibus, mirante cryptophylace. Idem experimentum bis atque iterum cum altera columba & cane (felis in itinere præ rabie obiit) probavi; deinde effossas terræ libras quasdam extra specum transtuli in quibus immersa canis, & columbæ capita nullum detrimentum passa sunt. Mox accensas varias faces per totum soli ambitum circumduxi quæ prout viridem muri oram præteribant, extingui coeperunt ubique. Eadem deinde animalia ad vicinas subterraneas & naturales stuphas

stuphas *sancti Germani* dictas traduxi ; experturus an eundem effectum aut quid simile operarentur ; hæ enim stuphæ longè calidiores sunt & vix manu tolerandæ ; vapor spissus & piceus è terræ sinu elevatur in sulphuris haud modicam copiam in telluris superficie condensandus. Huc Medici Neapolitani *lue Venerea* infectos ( quos solis diaphoreticis & stuphis sine Mercurio sanare pollicentur ) exudandos relegant. Verùm detenta ad solum diu animantia nullum vitæ discrimen subibant. Postea eadem animalia ad *Κρυκήν* cryptam iteram transtuli, & compressa aliquandiu ad aream tepidam utraq; columba & canis penitus obierunt. Rusticus mortuas columbas ad prandium paraturus domum tulit, asseruitque sæpe se extincta in hac specu animantia pro cibo sine salutis dispendio manducasse. Dehinc sumpta bilance, unum illius brachium, contortis in nodum staminibus, brevius reddidi, stante in solita longitudine opposito brachio, & sic positam in æquilibrio bilancem ita locavi ut longius brachium infra & curtius supra lineam viridescentem se habeant. Exploraturus eram, an si aer inferior gravior aut levior fuisset quam superior æquilibrium perderetur depresso vel sublevato

F 2

longiori



longiori membro, sed vix ulla sensilis apparuit mutatio.

## ARTICULUS SEPTIMUS.

*De variis circa mortiferam hujus  
foveæ virtutem opinionibus.*

**F**ertur Neapoli quod olim hujus regni Prorex malignam hujus fossæ virtutem in homine experiri cupiens, captivum Turcam huc duci curavit, cujus caput ad solum aliquandiu, non verò ad mortem usque inclinari jussit. Sed Turca diutius quam par erat compressus periit. Alii Mulos, Bubalos alii (quorum magnus est in hoc regno numerus) quidam oves, nonnulli Asinos, & varia discrepantis speciei animalia in hac specu trucidarunt. Nullatenus itaque dubitatur de vi *θανάτηφόρη* hujus speluncae, sed de causa illius variè à variis differitur. Quidam, quibus miraculorum multiplicatio cordi est, ab olim effuso hic loci copiosius martyrum sanguine hunc enecandi Characterem divinitus antro insculptum fuisse credunt. Alii cortice tantum tenuis rei naturam

ram perpendentes à calore & fumo suffocari animantia contendunt, non advertentes quod in vicina stupha in qua longè major est calor & fumidus vapor ne vel in minimum vitæ periculum incidunt. Plinius verò, Kirkerus & cæteri omnes nasutiores Philosophi, quibuscum mihi in Italia hac de re discurrendi copia data est, juxta mechanicas naturæ leges omnia peragi jure existimantes, non dubitant quin enecentur hæc animalia à venenoso quodam halitu è telluris gremio erumpente & per inspirationem in pulmones sese insinuante. Dissentiunt autem circa naturam virulenti hujus spiritus, alii *Alkalina* indolis esse & totam sanguinis compagem penitus dissolvere asserunt. Alii de *Acido* participare malunt & sanguineam massam subito coagulare; unde mercurialem alii, alii antimoniam, hi nitrosum, illi sulphureum, nonnulli aluminosum, plures vitriolicum, quidam arsenicalem esse pro suo quisque genio conjiciunt. Verùm qui æquiori trutinam perpendebit & allata jam experimenta cum afferendis inferius rationibus sine animi præjudicio comparabit, vix à quavis veneni specie è tellure eructata hoc phænomenon produci existimare poterit.

## ARTICULUS OCTAVUS.

*De veneni natura, multiplici ejusdem specie, & diversis agendi modis, ex quibus clarè infertur illatam in scrobe Neapolitana animantibus necem nullius veneni sobolem esse.*

**N** Eminem latet venenum esse id genus corpus quod in exigua mole intra nostrum corpus quomocunque intromissum natura sua ruinam illius molitur. Infestissimum hujusmodi corpus fossilibus quibusdam, vegetantibus, & animantibus inesse frequens & infausta plurimorum experientia abundè satis attestatur. Verùm etiam si concedamus è tellure hujus scrobis mineralem quandam auram emergere vix aptam esse credet quispiam quæ tam subitum & perniciosum effectum producat. Opifices enim qui mineralia ex incavatis terræ visceribus effodiunt tam repentinum vitæ periculum nunquam experiuntur, sed paralyfi, torpore



re corporis, Arthritide, Rheumatismo, gravedine capitis aut simili affectu tentari solent. Quis præterea mercurialia effluvia veneni indolem induere asseret, cum in Iliaco affectu libram integram, & amplius, crudi mercurii per os exhibere, & totum fere corpus eodem illinere in lue venerea cum frequenti fructu soleamus? qui in gravioribus morborum symptomatis emetica antimonii præparata, & illius decoctum cum manifesto morbi levamine assumunt salutiferam potius quam lætiferam illius fore virtutem ex autopsia affirmabunt. Quid in praxi Medica frequentius quam julepos vel alias portiones acidis sulphuris, salis, aluminis, vitrioli, imo nitri spiritibus ad gratum acorem imprægnatos ad compescendos febriles cruoris ferocientis orgasmos, & ad alias indicationes implendas propinare? Spagirici artifices in dissociandis horum mineralium elementis nullam fere unquam noxam saltem tam citò cum vitæ discrimine corripiunt. Inficiari sanè non audeo quin *halitus Arsenicali* venenosus sit, annuere tamen haud passum quod valeat tam citò mortem accersere.

Ut hæc omnia clariùs innotescerent discrepans multiplicium venenorum agendi  
modus

modus fusiori calamo hic loci investigandus foret. Sed cum hoc opus nimis prolixum sit, sat erit obiter observare venena ex triplici mixtorum regno deprompta, alia in solidas corporis nostri partes, in fluidas alia, alia denique in utraque virtutem suam exerere. Quæ organicas partes aggrediuntur echinata sunt, & rigidis prominent spiculis quibus partis texturam, & fibrarum stamina strigilis instar dilacerant, & corrodunt; cujusmodi sunt Sandaracha, Ochra, Hydrargyrus sublimatus corrosivus, lapis lunæ, vel vitrioli martis causticus, vitrum crassiusculè tritum in ventriculum ingestum, Boleti, &c. Quæ verò in humores agunt alia nimio fermentationis cestro percita eosdem dissolvunt & effringunt nimis, alia eos coagulant præter modum, alia denique narcotica vi irretiendo animales spiritus totam corporis machinam sopiunt, & sine sensu, & motu humi prosterunt. Hujus secundi ordinis sunt viperæ, serpentis, scorpionis, rabidi hominis vel canis, vel tarantulæ virus ex morfu in corpus intrusum, miasmata pestilentialia ex aere inspirata, succus portulacæ, succi vel liquores acidissimi omnes, opium, hyoscyamus, aconitum, mandragora, solanum maniacum, cicuta &c. Quæ tandem

tandem partes solidas & humores simul infestant non tantum organorum nativam texturam erodunt, sed præterea fluidorum œconomiam perturbant; uti sunt aqua fortis, aqua regia, & aquæ stygiæ omnes, virus venereum, remedia acriora in nimia dosi præscripta, cantharides, piperitis, flammula, emetica violentiora, butyrum antimonii, gutta gummi, resina jalap &c. In hac autem crypta culpanda duntaxat veniunt sola mineralia & præ cæteris arsenicum. Concipi tamen nequit quod auripigmenti effluvia per inspirationem in pulmones manuducta tam citò animal enecent; cum partes solidas prominentibus suis calcaribus dilanient solummodo & ulcus efforment. Verùm ulcera interna tam lætifera non esse probat dysenteria, ulcus renum: uteri, pulmonum, præcipuè in Phthisicis, qui per plures etiam annos per anacatharsin frustra pulmonum tussientes expectorant. In apertis autem animantium in hoc antro extinctorum cadaveribus nè vel minimum quidem erosionis aut soluti continui indicium detegitur; quod evidenter probat nihil exhalare è tellure quod dilaceret partes organicas aut ulcere effodiat.

Supereft ut demonstremus nihil pariter

G

cum



cum sanguine misceri quod principia illius diffociando nimis & diffringendo, vel stritius quam par est eadem colligando mirandum hocce lethum acceleret. Quod ut clarius pateat advertere obiter libebit totam cruoris compagem ex peculiari terræ, aquæ, salis, & sulphuris proportionem coalescere; quæ etiam si fluidi motu gaudeant mutuo tamen vinculo sese invicem amplectuntur, ita ut porosi terræ alveoli sint quodammodo receptacula salium & phlegmatis, & sulphuris filamenta horum omnium commune quasi involucrum cætera principia præcipuè salino-volatilia cæmenti instar stringant ita & irretiant, ut evolare & carceribus nequeant, sed in stabili & respectivo quasi connubio retenta ad perennem sanguinis fermentationem fovendam sponte conspirent. Si forte tamen heterogeneus aliquis sal insolito & rapidissimo motu intra sanguinis massam agitatus, sulphurea ejusdem stamina hirsutis suis aculeis discerpit nimis & comminuat, totam sanguinis compagem, soluto principiorum essentialium nexu, eliquabit. Moxque sales sanguinis volatiles (qui *primum* illius *mobile* dici quodammodo possunt) suis jam compedibus soluti, liberiori fruituri campo, ex sinu

cruoris

cruoris evolabunt & per totum corporis habitum exhalabunt, sanguinemque vapidum & effectum relinquent. Unde cordis & arteriarum motus debilitetur, vires prosterantur, & tota corporis moles labefactetur necesse. Uti in illa febrium malignarum, & pestilentialium specie videre est, in quibus hæmorrhagiæ difficilè sistuntur, & Petechiales maculæ observantur.

Si verò acidum quodvis fixum, & mole grandiori donatum quovis modo sanguini commisceatur, principia ejusdem ita approximabit, quod eadem, deficiente ad fermentationem spatio libero, & impedito particularum mutuo occurſu, motum deperdent: minor fluidi animalis quantitas in cerebro filtrabitur; sicque vires corruent: sanguis in grumos coagulatus præ crassitie sua per exilia sanguiferorum vasorum oscula, & fibrillarum porulos non nisi lente permeare poterit: unde torpescet in itinere, & tumores nunc internos, nunc externos, & præcipuè in ambagioso glandularum parotidum, aut axillarum tramite efformabit. Sicut in nonnullis febribus malignis, & peste contingit, quas bubones, anthraces, parotides, & feralis aliorum symptomatum apparatus concomitantur.

In nostro autem casu nullum est prorsus indicium dissolutionis, vel coagulationis nimiae sanguinis. Si enim duæ columbæ, vel alia duo ejusdem speciei animalia, una intra cavernam sponte mortua, altera foris data opera interfecta in eodem instanti aperiantur, & inspiciantur utriusque viscera (incisis confestim aorta, vena pulmonica, & sinistro cordis ventriculo) in solito, & naturali fluore, nec non in pari consistentiæ gradu utriusque animalis sanguis coccineus, & copiosus in præcordiis reperietur. Supponatur etiam quod dissolutus nimis sit sanguis fermento quovis acri, & volatili, quid proderit animal perituro aeri externo exponere, cum quamplurimis compertum sit experimentis quod aer non condensat sanguinem, sed crassescentem in venis fermentans suo appulsu dissolvit? Itaque tantum abest ut ab aere restitueretur animal, quin imo rarefacto ulterius sanguine citius periret.

Minor adhuc relinquitur conjiciendi locus quod sanguis concreseat ab accedente veneno acido; præterquam enim quod nullum præ oculis appareat hujusce coagulationis indicium, impossibile foret, ut tam citò animal moribundum restitueretur ab aere.

Qua



Qua enim energia concretum sanguinem tam subito attenuaret? Quibus hamis semel ingressas in finem sanguinis tot miasmatum virulentorum myriades foras extraheret? Qua velocitate easdem in pilosos venæ pneumonicæ alveolos cum circumcunte sanguine devolutas sequeretur? Quod ut penitus extra dubium ponatur, statuamus, ut fas est, totam pulmonum compagem ex vesiculosis contextam esse utriculis, qui bronchiorum caudici, & ramosis surculis implantati cavitare sua in bronchia tanquam in tubum pneumaticum hiant. Quilibet folliculus in duas tunicas veluti lamellas membraneas dirimendus est; inter quas innumerae exiles arteriæ, & venæ pulmonaris propagines serpunt; cum ea tamen naturæ industria, ut inter capillares horum vasculorum fines, intercapidines seu media spatiosa (rejectis anastomosibus) jaceant, quorum beneficio partis substantia alitur, & fermentum aereum ab inspiratione suggestum cruoris massam subit. Per harum intercapedinum exiguos porulos sanguis continuò in qualibet systole in hiantia venularum oscula toto circulationis impetu propellitur, ita ut nullam in trajectu moram patiatur. Statuta hac mechanica pulmonum fabrica

arduum videbitur, quod in hoc stupendo casu novus aer ab inspirato veneno animal liberet. Age enim, animal in cryptæ solo per spatium viginti cordis pulsationum (per hoc tempus imò diutiùs sine mortis periculo languescens, vel convulsus vivet) detentum removeatur, & aeri externo mox exponatur: aer attractum per id tempus venenum utpote extra sphaeram ejus procul positum, corrigere, aut obtundere non valebit; totum enim jam in vena pulmonari, in lævo cordis ventriculo, imò in aorta circulans procul à ponè sequente aereo (ut supponitur) antidoto distat; sicque non tantum tota sanguinis massa, verum etiam tota partium solidarum textura hac virulenta aura inquinata corrueret.

Cæterum, quis sanè mentis crederet, quod si inessent huic antro venenosa corpuscula Cryptophylax sine noxa extincta ibidem animalia in alimentum sumeret? Nequicquam erit respondere tam exiguum veneni quantitatem per totum corpus sese diffundere non posse; cum fermentum venereum in minima copia totam sanguinis massam inficiat. cum viperæ vel rabidi canis exiguum virus per totum corpus sese expandat. Cum laudani vel semigranum totam corporis humani

mani machinam vi ejus narcotica sopitam humi prosteruat. Hæc phænomena ex indefessa materiei cujusvis ad divisionem aptitudine luculenter deducuntur. Nec proderit dicere veneni particulas in sanguine solo innatare non verò in partibus solidis requiescere; cum sanguis ipse mortuo animali inter minutas partium organicarum fibrillas, nec non in earundem exiguis tubulis concretus torpescat; uti in lotò musculo videre est, qui ferè totus in purpureum sanguiniforme liquamen abit.

Quidam adhuc dubioprocul, spretis hisce rationibus experimentorum fulcro innitentibus, pertinaciùs contendunt mysticam hancce apparentiam veneni effectum esse: hac fortasse delusi observatione, quod in fodinis subterraneis ex quibus plumbum, carbo petræ, cuprum, vitriolum, & alia fossilia eruuntur, artifices aliquando vix respirare possent, & tantum non suffocentur, imo faces accensæ nonnunquam ibidem extinguantur. Hic autem effectus non à venenosa miasmaturum qualitate semper produci-  
tur, sed ab eorundem copia majori. Ex commota enim à fossoribus minera spissæ particularum mineralium nubes elevata totum foveæ spatium replent, & posita mate-  
riei



riei cuiusvis impenetrabilitate, idoneum respirationi aerem expellunt. Unde pro aere laudabili inspiratur fumus hicce mineralis, qui vesiculares pulmonum pyxides infarciendo respirandi difficultatem inducit; uti contingit in camini vertice densiori fumo pleno; vel in via sicca, & pulverulenta quando levi ventorum flatu, & curruum, vel frequentis populi transitu excitati pulveris nube aer obfuscat. Vel si forte idem vapor veneficis scateat effluviis, uti vitriolicis, nitrosis, arsenicalibus, &c. non tantum prope antri solum, sed etiam ad spectabilem altitudinem, & distantiam, non tamen in tam brevi temporis spatio, sed post dies aliquot, aut saltem plures horas mortem inferret sanguinis texturam stringendo nimis, vel eandem nimis dissolvendo.

Nullius, quod sciam, veneni carbonibus ardentibus impositi vapor accensum funale extinguit, nisi copiosissimus sit. Fateor equidem quod spissus, & piceus non tantum venenosus, sed etiam alterius cuiusvis igniti corporis fumus oblatae candelae flammam intercipiet. Quod quidem insita quadam suorum corpusculorum virtute non efficit, sed quatenus ignigenas, & detonantes nitri aerei particulas ad deflagrationem cuiusvis corporis,

poris, (ut creditur) requisitas, vel potius aerem ipsum rarefacit nimis, & obvium quantitate sua, & motu expansivo, excusa sibi per medium semita, removet, & ad latera violentius urget. Levem autem hujus scrobis calorem, aut tenuem ejusdem vaporem tanto operi imparem esse censebit, qui accensam faciem propè intensissimum ignem, & in locis longe calidioribus flagrare animadvertet.

Porro non tantum patet subitum huncce animantium interitum malignæ auræ effectum non esse, sed & ulterius ne vel minimum quid virulentum à cryptæ gremio erumpere liquidò demonstrari potest. Totum enim inane aereum supra viridescentem muri peripheriam hac labe immune in vita animantia fovet; quod longè secus dubio procul eveniret si subiacens aer virulentis effluviis fuisset onustus: hæcce etenim effluvia cujuscunque indolis sunt salinæ, vel metallicæ cum toto aereo fluido promiscuè sese confunderent. Unde non solum in tota spelunca, verum etiam in tota circumquaque vicinia animantia interficerent. Nec dicat aliquis illis deesse motum, ut ulterius in superpositam atmosphæram pergant. Quis enim crederet miasmata ab interiori terræ

recessu per ambagiosas terræ resistentis porositates foras eructata ab fluxili aere minus renitente repulsum pati posse? Aut si forte hucusque duntaxat ascensus meta pertingit, saltem ab incumbente strato aereo tanquam à *reflexionis puncto*, uti solet lapis in aera per perpendiculum projectus, deorsum reverberari deberent, & in sensili quadam forma, saltem post tot sæcula à quibus hoc phænomenon stupefacit, in extrema telluris superficie crySTALLIZARI. Perspicilla huic vaporì oblata quadam nullius energiae materie, & humano halitui haud absimili tinguntur. Idem vapor *Alembici* beneficio in forma liquoris collectus insipidus percipitur, & inermis. Spongia limpida aqua exactissime lota in hac crypta diu relicta, & ad satietatem sublimato halitu imprægnata, si manu forti super vas aqua repletum comprimat, nihil prorsus sub sensili, aut liquida forma exhibebit. Dein si eadem spongia in aquam immergatur, & lavetur, & hæc saturata aqua quæ vix colorem mutat cuivis animali potanda relinquatur, nullam unquam noxam, aut vitæ periculum inferet. Hæc cuncta satis superque ostendunt huncce vaporem veneno penitus esse immunem.



## ARTICULUS NONUS.

*Animantia in hac specu à nullo infesto corpore interficiuntur, sed sponte emoriuntur ob defectum aeris elastici, & respirationi idonei.*

**J**A M tandem deposita veneni cujusvis suspicione, ad alium discurrendi scopum collimare necesse est, unde stupendi hujus effectus genuina ratio eruatur. In hac autem indagine inferior *cryptæ* aer accusandus occurrit; à cujus solius vitio repentinum huncce animantium obitum oriri existimo. Hic autem loci peccare nequit aer nisi penitus desit, vel densus nimis sit, vel rarus præter modum. Infra viridescentem marginem non deficere penitus aerem apprimè probat factum cum bilance experimentum quo observatur infimam *cryptæ* regionem æqua ferè gravitate pollere cum regione superiori. Densum pariter non esse præter immodicum totius hujus regni calorem do-

cet satis natus hujus cavernæ tepor. Unde superest tantum ut præter modum attenuatum, & proprio elatere orbatum esse conjiciamus ita, ut *fluidum aere spatium Ætherem potius, quam Aerem esse judicemus*. Hoc capacior morituri animalis hiatus denotat, quod fugientem quasi aerem, sed verè deficientem diductiori ore amplecti, & copiosius inspirare luctatur.

Duplex in ipso statim limine problema obviam venit; unde nimirum est, quod aer hic loci rarefiat, & rarefactus animantia trucidet? In promptu erit respondere subtiliari aerem à subterraneo hujus antri calore, vel potius fermentatione. Verum unde erit quod in montibus Vesuvio, & Phlegræo nihil simile contingit, etiamsi non solum intensissimum calorem, & fumum latè diffundant, verum etiam citra appropinquantium viatorum, aut animantium periculum ardentissimas flammæ in aera evomant? Quomodo in nostris laribus feles, & canes domestici hyemis frigore obsessi in ipsis ferè favillis deurentibus sine noxa degunt? Quare fax non accensa flammæ in ipsa flamma in qua aer vel nullus, vel subtilissimus est, corripiet, & eadem fax accensa prope ignem violentissimum cremari non

non desinet? Hinc arguere licet calorificas subterraneæ fermentationis particulas infimum hujus cryptæ aerem adeo non attenuare, ut vitali respirationi præ tenuitate sua ineptus evadat. Nam hæc corpuscula non tantum in summa ac sensili copia erumpere, sed violento, & turbinato motu circa axem rotari deberent, ut cohærentes sibi aeris floccos cuneolorum instar dissociarent invicem, & ut peculiarem aeræ materie extensionem ad majorem, quam ipsius quantitas exigit, dimensionem localem expanderent. Fieri autem non potest, ut in tanta copia, & cum tanto impetu eructarentur sine intenso calore, & quin cum toto aereo fluido commiscerentur, totumque antrum hominibus, & pecudibus inaccessum lethiferumque redderent. Præterea quod è terræ gremio exit, vel de salis, vel aquæ, vel metalli, vel de horum omnium natura participat. Quis verò dicet aerem phlegmate, vel sale, vel miasmatis mineralibus, quæ ipso aere longè crassiora sunt, imprægnatum ab iisdem rarefieri? Absurdum foret asserere aerem marinum aqua salsa gravidum subtilem esse. Nec minus futile esset aerem hyemalem nubibus, pluviis, nive, & aliis vaporosis meteoris onustum rarefactum



refactum vocare. Quis aerem spisso fodinæ mineralis fumo, vel alio pulvere gravem crassum non appellabit? Quicquid enim rarefacit rarefacto corpore subtilius longè, & volatilius esse debet, ut in pastæ, vini, cerevisiæ, & in reliquis naturalibus, & Chymicis fermentationibus, seu quod ferè idem est rarefactionibus videre est. Unde tantum abest ut particulæ minerales è tellure elevatæ attenuarent aerem, quin imo spissiores longè, & crassiores redderent.

Cum igitur sponte sua rarefieri nequeat aer, nec rarefcentiam ab erumpentibus è terra effluviis vaporosis, aut mineralibus mutuetur, necessum est ut statuamus *Æthereum quendam, & tenuissimum spiritum, minerales quasvis particulas, & aerem communem subtilitate longè superantem, lethiferam foveæ hujusce regionem subire, qui quantitate notabili, & rapido motu vivificum aerem removeat locumque illius occupet.* Quòd in tota mundi fabrica diffusa sit materia aere longè subtilior, & quod in eadem materia posita animantia vivere non possint, credet facile quisquis posita mundi plenitudine, & rejecta vacui possibilitate machinam pneumaticam Cl. Roberti Boyle observabit; in qua immissa animalia, candela, vel quodvis corpus ignitum

tum extracto crassiori aere statim emoriuntur. Quamvis tamen existimen subtilissimam hancce auram in antrum copiosius fluere, affirmare non audeo, quod in perpendiculari motus determinatione è nucleo terræ sursum evolet: in hoc enim sensu moveri nullatenus posset quin extra viridescentem muri sphæram elevetur, & quin proinde totum cryptæ aerem rarefaciat. Unde censendum est quòd in linea horizontali à margine viridescentis parietis unius lateris ad marginem oppositi lateris indefesso & celerrimo motu determinetur. Et cum è porulis undique muri inferioris æthereum hocce fluidum erumpat, quot erunt pororum myriades totidem & erunt ejusdem rivuli, qui è tota antri circumferentia tanquam radii ad centrum cavernæ rapidè concurrentes, crassioremque aerem depellentes, *torrentem æthereum* efficient, qui inferiorem cryptæ regionem viridescentibus parietibus respondentem replebit. Verùm cum præterea in muro adsint præter porulos innumeræ partes solidæ quas fluidum æthereum permeare non possit, inter radios ætheris rivulos è porulis muri exeuntes jacere debebunt spaciola ab aere communi occupata. Unde hoc spatium *Θαλαττοφρον* non  
totum

totum æthereum, sed *Æthereo-aereum* nuncupandum est. Et hinc est quod Ranae, Testudines, & alia amphibia, quæ pauciores aerem ad vitam conservandam requirunt, in hoc antro diutissime vivere possunt.

Fateor equidem quod explicatu difficillimum sit cur in hoc antro subtilissimus æther peculiari hocce modo circuletur. Cum tamen peculiaris sit, & viridescens cryptæ infimæ color, verisimile est quod ibidem latet dispersum feminium quoddam minerale, vel marcellita metallica, fortasse de magnetis natura particeps; cuius fossilis materiei suo modo dispositæ beneficio fluidum æthereum ingressum exitumque liberum in tota foveæ peripheria inferiori reperit. Hanc materiam mihi detegere non vacabat nec licebat, prohibitum enim est murum effodere ne vis lethifera evanescat. Imo etiam si mihi detexisse contigisset quid metallicum, arduum foret adhuc indagare quænam esset particularum ejusdem homogeneitas vel dissimilitudo, quænam pororum correspondentia aut disproportion, quæ circumituræ auræ subtilissimæ aditum egressumque largiantur. Unde hæc mysteria acutioris ingenii Philosophis investiganda relinquo. Quamvis tamen genuinam hujus circuitus causam



causam certò excogitare non valeam, cum effectus supra descriptus alterius causæ (ut demonstravi) soboles esse nequeat, meritò licebit conjicere fluidum æthereum ab ambientibus cavernæ parietibus ad centrum ejusdem, & à centro ad parietes perenni motu circulari. Nec tanti momenti est scire modum, aut occasionem hujus circulationis modo circulantis spiritus tenuissimi existentiam ibi necessario esse probemus. Nec neganda est rei cujuscumque existentia quamvis existentia modus non satis pateat. Quemadmodum non dubitare datur de perpetuo sanguinis transitu ab extremis arteriis in venulas, quamvis oculis microscopio munitis interjecta communicationis spatiola discerni nequeant; nec adhuc modus quo sanguis ipse transit verè innotescat.

Quicquid de *Neapolitana crypta* dictum est hactenus, idem quoque de omnibus aliis censendum est antris, in quibus sine veneno, fumo, aut vapore viventia & funalia accensa emoriuntur. Verisimile enim est quòd ea debet esse parietum & pororum eorundem dispositio & natura, ut fluido æthereo patientiorem largiantur semitam in antri cavitatem. Sicque cavitas *Æthere* prætermodum repleta vitali aere exinapitur; ac proinde

respirationi redditur & flammæ conservandæ inepta. Nunc verò perpendendum quomodo ex defectu *aeris elastici* in specibus *fluidi æthereo* repletis animantia & candelæ evanescent.

### ARTICULUS DECIMUS.

*Quomodo in spatio subtili fluido, nullo aere elastico aut crassiori donato, animantia & faces accensæ expirant.*

UT mirum nemini videatur cur animantia quævis, vel accensæ faces in spatio quovis, aere elastico, vel crassiori destituto extinguantur; advertendum est, aerem per respirationem non introduci à natura in thoracem duntaxat ut per pulmones expansos liberiores sanguinis transitum elaboret, ut nonnulli voluerunt. Sic enim pulmones fuissent superflui; sed ut innatante sale nitrosam indolem æmulante, vel potius tota sua tenui substantia reducem à cunctis corporis partibus sanguinem, & in  
itinere

itinere facta insigni principiorum, volatili-  
um jactura, crassescens, tanquam no-  
vo fermentaceo stimulo rarefaceret, mu-  
nisque suis ritè exercendis idoneum redde-  
ret. Ita ut simulac nitrosum aeris symbo-  
lum in quovis loco penitus, vel partim fer-  
mentando animalium sanguini denegatur,  
expansivus illius motus subito debilitatur,  
ac proinde cor languidius pulsat, vires pro-  
sternuntur, & retardato tandem vel penitus  
desinente humorum circuitu, tota corporis  
machina labefactatur, vel corrumpitur penitus.  
Inde est quod in loco angustiori uti in arca  
strictè occlusa, vel in vase vitreo obturato  
animalia suffocantur. Et in comitiis publi-  
cis, & propè ardentioris focum quidam in  
animi deliquium incidunt. Quia aer inclu-  
sus attenuatus nimis, vel absorptus à fre-  
quenti, & diuturniori respiratione, vel à  
flamma nitrosis particulis iners evadit ut  
torpescens sanguinem suo appulsu fer-  
mentaret.

Nec magis vitali animalium, quam accen-  
sæ candelæ flammæ conservandæ competit  
elasticus aer. Non magis fortasse, quia de-  
tonantibus sui vitæ particulis cum facis sul-  
phure unitis, ut in pulvere pyro videre est,  
funale reddit inflammabile, ut vulgo existi-



matur; quam quia erupturas actensæ facis  
 igneas particulas ambiens undique & gravi-  
 tate sua comprimens, in se invicem, ut co-  
 nica flammæ figura testatur, cogit, & in  
 flammæum quendam turbinem coacervat.  
 Ambiens enim aeris superficies ab erumpen-  
 tibus ignis innumeris atomis repulsa elate-  
 re proprio subito restituitur, & evolantes  
 facis ignitæ particulas ad flammæi vorticis  
 centrum in flammæ formam abituras impe-  
 tuosè repellit. Eadem aeris compressio in-  
 servit multum, ut inflammata longissima  
 fax à summo vertice ad fundum continuâ  
 repetitæ accensionis seriè comburatur. In  
 altum enim volaturas ex ellychnio igneas  
 particulas deorsum depellit in alias quie-  
 te gaudentes, illasque in motum violenter  
 agit; hæc pariter motæ iterum alias subja-  
 centes agitant; hæc alias: & sic ad imum  
 perseverat continua reciproci particularum  
 motus propagatio. Quemadmodum enim  
 nos ipsi majorem longe in coenosa palude,  
 quam in aqua marina, & in pellucida flu-  
 vii aqua, quam in aere resistantiam ambu-  
 laturi experimur, ita & rotata flammæ exci-  
 lia corpuscula majorem in aere crassiori,  
 quam in subtilissimæ æthere resistantiam  
 reperviunt. Quando enim aer tenuis est  
 maxime,

maximè, & mobilis cedit facile erumpentibus flammæ particulis. Unde hæc particulae nullam passæ deorsum reflexionem movere non valent substratas alias confimiles partes; sicque statim vorticosa ignearum particularum cohortes nullam in aere obicem nactæ, hinc inde diffuunt facile, & evanescent, flammæque formam citissimè deperdunt.

Quamvis in hoc spatio æthereo accensum fumale cremare nequeat, pulvis tamen pyrius flammam ibidem facile corripiet. Si enim humi disseminetur ita ignigena huius pulveris granula, ut ab externo antri vestibulo ad interiorum ejusdem superficiem contigua, & densa sit pyriorum globulorum series, appropinquata ante fores accensæ candelæ (intus enim sine extinctione appropinquari nequirit) successive sed subito cum detonanti explosionis impetu cuncta in flammam, & dein in fumosam antram abibunt. Unde advertendum est id inesse discriminis pulveris inter pyrii & candelæ ignitionem; quod pulvis pyrius ob peculiarem sulphuris, nitri, & carbonis unionem subito flammam capit, & citissimè cum flammâ evanescit. Candela vero correptam sensim flammam diutissimè conservat. Sicque non mirum quod in hac specu pulvis

pyrius in flammam abeat, ubi candelæ flamma extinguitur. Ut enim corpus quodvis ignescat id solum requiritur ut ejusdem particulae integrantes summe dividantur, & divisæ pernicissimo motu exardescant: ut in violenta duorum lapidum, silicis & ferri, & duriorum corporum collisione videre est. Sicque accensi funalis atomi summo motu percitæ, jacentes ante hujus antri fores, moleculas pyrias in motum violenter agunt: hæ pari motus gradu rotatæ vicinas summe mobiles ad motum pariter urgent; hæ alias: sicque subito in horizontali cursu per totam cavernæ superficiem novi ignis genesis propagatur.

Ex celebrato in hac scrobe circa pyrii pulveris incendium experimento, dubitare datur utrum aer absolute requiratur ut flamma generetur. Ostensum enim est hic, nullum esse aerem, etiamsi pyrius pulvis flammam ibidem corripit. Præterea in *antlia pneumatica* exhausto aere immissa corpora à speculo ardente calcinantur, imò pyrius pulvis in eadem aliquomodo detonat. Verum etiamsi ex his arguere fas sit, quod aer non sit omnino necessarius in flamma generatur, absolute tamen requiritur ut flamma jam aliunde generata diu conservetur.

Aer



Aer enim pondere suo & elatere igneas scintillas a flammæ vorticis centro ad circumferentiam evolantes & circumferentia ad centrum in novi ignis fomitem abituras impetuose repercutit. Quod in accensis facibus flammam constantem efficit, idem quoque in ignito pulvere pyrio efficeret, nisi totus simul in flammam abiisset. Quamvis enim aer repelleret ignitas tormentarii pulveris particulas, quoniam novum deesset pabulum igniendum, flamma citò pereat necesse est.

Itaque aer respectu flammæ, eodem fere modo se habet ac olla respectu aquæ, quam continet, effervescentis; cum illo tantum discrimine quòd ebulliens aqua invictam experitur resistentiam ad ollæ parietes: flamma verò concavam includentis aeris superficiem utpote fluidam & mobilem ampliat & violenter repellit. Ampliata verò & repulsa vasiformis aeris concavatis ab elatere aeris ponè compressi restituitur rursus, & subito coarctatur; & sic aer evanescentes flammæ scintillas arctius undique amplectens, geminatis quasi viribus, in flammæum quandam turbinem coacervat.

Obijcietur dubio procul quòd in antris ferarum animantia & facies nullatenus ex aeris

ris

ris, sed ex *nitri aerei* defectu expirant. Recep-  
tissima enim est ubique gentium opinio de *ni-  
tri aerei* efficacia; quâ contenditur post Cl.  
D. Mayow quod aeris *nitrum* in sanguinem in-  
troducitur per pulmones; quod sanguinem  
fermentat & attenuat, ipsique fluorem & ru-  
bedinem conciliat, & quod spiritibus anima-  
libus gignendis materiam suppeditat. Quod  
aer ipse pulmones subit ut sit solummodo  
*nitri aerei vehiculum*; quod vesicularum  
pneumonicarum porulos permeare non po-  
test; ac quod proinde nullum in latice san-  
guineo effectum producit. Sicque conclu-  
detur quod animantium mors in his *Cryp-  
tis* non soli aeris, sed *nitri aerei* defectui  
attribuenda est. Prolixum, fateor, hic ni-  
mis foret receptam de *nitri aerei* indole &  
virtute sententiam perpendere. Et arro-  
gantiae reus videretur si solus ego tot præ-  
claros viros qui hanc opinionem utrisque  
ulnis amplexi sunt & foverunt, à veritatis  
tramite deviasse assererem. Quare plenio-  
rem hujus materiae indaginem ad peculia-  
rem alibi tractatum, quando mihi vacabit,  
contexendum remittam. Interim tamen,  
ne res penitus intacta prætermittatur, ad-  
vertere obiter licebit quod *nitrum aereum*  
sal neutrum est, & falsum, de *Acido fixo* par-  
ticeps;

ticeps; uti ipsius destillatio in *retortis* & vasis depressis brevioris colli demonstrat; in *cucurbitis* enim & alembicis aut altioribus vasis sublimari non potest; indicium sanè luculentum quòd nihil volatile continet. Aqua quævis dissoluto nitro saturata, *spiritus nitri*, & omnes *nitri* præparationes quomodocunque cum sanguine commixtæ, ipsum prætermodum coagulant. Inde haud levis conjiciendi ansa offerri videretur, quod tantum abest ut particulæ nitro-aeræ in cruorem intrusæ ipsius circuitum aut fermentationem promoverent, quin imò ipsius motum summâ suâ coagulandi virtute retardarent. Præterea neque millesima pars *massæ aeræ* in qualibet inspiratione in pectus impulsæ nitrosa est; unde non tantum nutriendis spiritibus, sed etiam fermentando sanguini nitrosa hæc portio (etiâmsi volatilis perperam supponatur) impar esse videbitur.

Quid aliunde impedit quominus ipsa aeris substantia per vesicularum bronchialium porulos in sanguinem sese insinuet? Ipsi enim *nitri aeris* fautores concedunt quod non solum nitrum aeris crassius, sed etiam particulæ *antrorum* virulentæ & aeris pestilentiales pulmones pervadunt. Præterea



densi vapores & fuligines ex iisdem thora-  
 cis porulis à sanguine mandatae emergunt.  
 An igitur insensilem & oculorum aciem fu-  
 gientem aeris substantiam his omnibus cras-  
 siorem esse censebunt? An aditum aeri de-  
 negabunt, ubi particulae salinae, minerales,  
 vapores, & moleculae crassiores viam sibi  
 excudunt? Nec tantum ratio suadet, sed  
 etiam experientia demonstrat quod aer san-  
 guinem ingreditur; saepe enim, lotis prius  
 cum injectione pulmonibus, aerem ex tra-  
 chea arteria per pulmones in venam pulmo-  
 narem ad cor usque sufflando transmissi.  
 Quod si semel aeri ingressus per thoracem in  
 sanguinem, ut fas est, concedatur, nitro  
 aereo amplius opus forsan non erit ut rare-  
 factio sanguinis & subtiliatio perficiatur.  
 Aer enim ipse in sanguine calente inclusus  
 hunc effectum facilius fortasse praestabit  
 quam nitrosae particulae. Observamus enim  
 quod quotiescunque aer in loco calidiori  
 inclusus est, rarefcit confestim, & ita ali-  
 quando expanditur quod includens vas dis-  
 rumpit. Vesica nempe aere repleta & in fer-  
 vidam aquam immersa crepare nonnun-  
 quam solet. Quidni pariter aer inter an-  
 gustos fibrosi sanguinis loculos contentus  
 (modo jam in atmosphera non fuerit nimis  
 aliunde

aliunde rarefactus) à calore sanguinis expandatur? Quidni aer expansus ambientes loculos, qui fluidi & mobiles sunt, diffingat & dislociet? Quidni quoque hic aer in toto æqualiter pulmone, ita dilatando, disjungendo, & discerpendo sulphurea & fibrosa sanguinis filamenta, totam quoque æqualiter massam sanguineam raram, tenuem, fluxilem & spumofam reddat? Sic ipsæ solæ aereæ particulae, expansionis & elateris capaces, totum illud opus præstare posse videntur, quod nitri aerei virtute perfici existimatur.

Non minùs attenuando sanguini (beneficio respirationis,) quam generandæ flammæ conducere *nitrum aereum* aliquis existimaret, qui subsequens perpenderet argumentum. Nam præter allatas superiùs rationes, supponamus spatiosum in furno quovis ignem ardere; ita ut ignis vel flammæ diameter sit sex pedum. Sit furnus omnium artis industria ex solidissimis lapidibus tenaciori cæmento sibi applicatis pavitus undique & laqueatus, ita ut nullibi aer ingredi nec flamma egredi posset nisi per unum orificium, uti videre est in clibanis pistoriis vulgaribus. Nunc, amabo, quomodo tam amplius ignis & flamma à *nitro ae-*

reo fovebuntur ? Per quas vias nitrum fornacem ingrediatur ? Nullibi, nisi per idem orificium per quod flamma foras exit ; sed erumpens flamma introituum nitrum repellere luctabitur. Vel esto quod ingressus aer, ut ratio suadet, exeuntis flammæ locum occupet ; externam tantum ignis & flammæ superficiem lambet. Quid interim flammam in meditullio & fundo fornacis pascet ? Unde *nitro-aereum* pabulum defumetur ? Illud ab externo aere accersere foret remotum. Quis enim sibi persuadere poterit quod *nitrum* aeris ab longinquis furni faucibus per mediam ardentissimam flammam ad ignis meditullium & fundum per sex pedum longitudinem penetrare valeat, ut ligna ibidem, prunas, aliudve ignis pabulum, fomitis instar, accendat ? Dubio-procul huc usque nunquam pertinget : vel si ab externi aeris gravitate ( quod difficile concipietur ) hucusque impelli supponatur nitrum, antequam ad optatum locum appellet, in tam deurente itinere ignigenâ virtute penitus spoliabitur.

In brevi hujus sermonis gyro omnes accumulare non vacat rationes, quæ decantatum toto orbe *nitrum aereum* expugnare viderentur. Credibile tamen est quod si quis  
omni



## ARTICULUS UNDECIMUS. 77

omni animi præjudicio exutus attributos  
nitro aereo effectus æquâ perpenderet tru-  
tinâ, receptam de ipsius naturâ opinionem  
si non errori obnoxiam reperiret, saltem  
de ipsius veritate dubitare inciperet; &  
forſan poſt maturum tam latentis phœno-  
meni ſcrutinium, ſentiret quod neque aer  
neque nitrum aereum generandæ flammæ ne-  
ceſſaria ſunt: ſed quod flamma prius à  
flammâ, vel ab aliâ materiâ pernicioſiſſimo  
motu percitâ producitur; producta verò  
ab ambientis aeris gravitate & elatere, con-  
geſtis in unum corpus ſcintillis, conſer-  
vatur.

## ARTICULUS UNDECIMUS.

### *De Antrorum ſubterraneorum mixta materia.*

DE illis hic ampliùs non diſſeritur ca-  
vernis, quæ virulentis ſcatent effluviis;  
nec de illis quæ vaporoso aere inquinatæ ſunt;  
neque de aliis quæ fluido Æthereo nimis redun-  
dant; nec de ſpatijs ullis in quibus animantia  
vel factiſignitæ ſubito vel paulatim expirant.

## 28 DE ANTRIS LETHIFERIS

Sed pauca tantum dicenda veniunt de locis illis subterraneis, & praesertim *fodinis*, in quibus artifices liberè respirant, & tutò diu laborant; sed progressu temporis & post elapsos quosdam annos in pravam corporis habitum, & varios aliquando morbos prolabuntur; quibus, tanquam *rude donati*, ab opere desistere coguntur.

Qui lapides incidunt opifices, qui vitriolum, carbonem petrae, sulphur commune, plumbum, alumen, & varia id genus mineralia effodiunt nonnunquam in Phthisim quidam, quidam in Asthma, alii in torporem corporis vel Paralytim incidunt. Nonnulli Arthritide, vel Rheumatismo corripuntur; alii Cephalalgia vel Colicis doloribus cruciantur. Hæc omnia inde provenire existimo, vel quia pulmonum vesiculæ arenulis vel spissa materia infarciuntur; vel quia ab inspirato fumo densiori sanguis consistentiam & acrimoniam acquirit. Non mirum est quòd qui continuò mineras & terram removent, spissam vaporum nubem excitent; & quòd in thoracem eorum terræ, lapideæ, & minerales particulae cum aere ingradientur, & per plures annos ingredientes capsulas pulmonum vesiculares tandem infarciant; ac proinde introi-

turo

## ARTICULUS UNDECIMUS. 79

turo aeri locum denegando respirandi difficultatem & Asthma accersent. Experientia enim constat quod in mortuorum lapicidarum pulmonibus arenosa sæpe reperitur materia, quæ illos, dum vixerunt, anhelos reddebat & tabidos.

Non tantum spissus fodinarum fumus processu temporis bronchiales loculos replet & gravia inducit symptomata, sed etiam ple-  
rumque particulae *salinae acide*, vel *sulphuree* fixæ pulmones pervadunt in sanguinem, illique paulatim consistentiam crassiorem, tardio-  
rem circuitum & fermentationem conciliant. Sanguis ita prætermo-  
dum inspissatus difficilis per exilissimos pulmonum aliarumque partium meatus transit: unde in  
pulmonibus tubercula, & obstructions in  
aliis visceribus generabit; ac proinde asth-  
maticam dyscrasiam inducet. Glandulas ce-  
rebri vel nervorum origines obturabit; sic-  
que spiritibus, qui tunc quoque ob defe-  
ctum fermentationis in sanguine in minimâ  
copiâ filtrantur, via denegatur: unde do-  
bilitas & musculorum resolutio subsequetur  
sunt. Præterea hic sanguis in corporis  
emunctoriis haud facile recrementa depo-  
net propter glandularum infarctum & se-  
cernendæ materiæ cum spisso sanguine in-  
tricatio-



tricationem; sicque cruor acris ac proinde nutritioni ineptus evadet. Unde Phthisis, macies, & tandem marasmus oriuntur. Eadem quoque sanguinis acredo hic inde sensiles partes pungendo, nunc Arthriticos, nunc Rheumaticos, nunc Colicos dolores vel Cephalalgiam excitabit. Hi enim dolores, etiam si ex discrepanti nomine & sede naturâ discrepantes censeantur, re tamen iidem sunt & ab eadem causa producuntur.

Hic prolixum foret ea describere remedia quæ illis conducunt qui in huiusmodi affectus deciderunt; peculiaris enim prius cuiusque morbi historia cum toto apparatu præmitti deberet. Quare sat erit advertere quod minerarum fossiores, quando recensitis symptomatis sese obnoxios fore verentur, ab acidis, falsis, & aliis incrassantibus alimentis abstinebunt: & iis solummodo utentur quæ sanguinis fermentativum motum promovere apta sunt. Qualia sunt sinapizata, piperata, liquores spirituosi & volatiles, vinum vel cervisia herbis aromaticis saturata, salviâ, roremarino, hyssopo, lavendulâ, nasturtio aquatico, beccabungâ &c. Item potus ardente ferro identidem chalybeatus. Decoctum Thè & Caffè continuo propinabitur. Aquæ minerales

# ARTICULUS UNDECIMUS. 81

nerales *Marte* gravidæ haud levis momenti  
cenferi debent ; & cætera medicamenta,  
quæ vias referare , sanguinem attenuare,  
ipsiusque acorem emulcere valent.

Antequam huic opusculo finem imponam,  
advertere necessum est, quod pleniorẽ *An-  
trorum Lethiferorum* Historiam hîc tradere  
supervacaneum fore visum est ; cùm innu-  
mera eorum exempla Plinius , Kirkerus,  
Robertus Plot hîc nunc in Anglia , alii-  
que Historiæ naturalis scriptores passim no-  
bis suppeditent. Quare hîc tantum omnes,  
quas ipse in regionibus exteris vidi , quæ-  
que ab aliis describuntur *Cryptarum feralium*  
species, ad certas classes, certos operandi  
modos, & ad quoddam veluti rationis *Sy-  
stema* redigere volui.

**F I N I S.**

**L**

**INDEX**





# I N D E X

## Contentorum Phœnomenon.

- D**E Antris Lethiferis in Genere. 1.  
*Microcosmi & macrocosmi comparatio.* ib.  
*Terræ superficies est perenne vaporum spiraculum.* 2.  
*Humani corporis & terræ antiperistasis.* 3.  
*Quare fontes calescant magis in hyeme, & Terræ-motus frequentiores sint, quam in æstate.* 4.  
*Vaporum ex terra exhalantium divisio.* 5.  
*Antrorum Lethiferorum divisio.* 6.  
De Antrorum feralium Virulenta materia. 9.  
*Atmosphæra principia & aeris contextus.* ibid.  
*Telluris globi principia & diversa corpora.* 10.  
*Antimonii & mercurii partes non sunt virulente.* 11. 47.  
*Metalla, terræ minerales, & lapides nihil in se virulentum continent.* ibid.  
*Venena ex terra exhalantia ratione sui salis agunt.* 13.

M U H N T D E I X O

- Diversus agendi modus venenorum.* ibid.
- Stupendus & lepidus virulenti vaporis effectus.* 14.
- Ab hyemali frigore homines & bruta obriescunt.* 17.
- Stupendum Cataleptici affectus exemplum.* 19.
- De Pestis natura & operandi modis.* 20.
- Contra virulentos vapores remedia.* 22.
- De Antrorum Lethiferorum innocuis vaporibus.* 24.
- Motus aeris duplex, fluidi & translationis.* 27.
- Motus & quies in se nihil sunt, sed externus respectus.* 28.
- Torpescentis aeris & stagnantis aqua comparatio.* 29.
- Quare stagnans aqua insalubris est, & fluens aqua est salubris.* ibid.
- Quare aer torpescens est insalubris.* 31.
- Quare quaedam caverna subterranea mortifera sunt, aliae vero innocuae.* 33.
- Remedia res convenientia qui in vaporosis cavernis in tantum deliquium incidunt.* 34.
- De Antrorum Lethiferorum Aetherea materia.* 35.
- Crypta Neapolitana Historia.* 36.
- Experimenta quae in antro Neapolitano fieri solent.*
- De variis circa mortiferam Crypta Neapolitana virtutibus.*

# C O N T E N T O R U M.

<i>Virtutem opinionibus.</i>	44.
<i>De Veneni Natura, multiplici ejusdem specie, &amp; diversis agendi modis.</i>	46.
<i>Triplex venenorum genus.</i>	48.
<i>Principiorum sanguinis unio &amp; contextura</i>	50.
<i>Quomodo sanguis nimis dissolvitur, &amp; dissolutus virium prostrationem inducit.</i>	ibid.
<i>Quomodo coagulatus nimis sanguis vires tollit.</i>	51.
<i>Pulmonum structura mechanica.</i>	53.
<i>In Antro Neapolitano nullum est venenum.</i>	57.
<i>In antro Neapolitano animalia expirant tantum ob defectum aeris elastici.</i>	59.
<i>Aer non potest à vaporibus rarefieri.</i>	61.
<i>Quomodo in spatio subtili nullo aere elastico re- pleto animalia &amp; faces extinguuntur.</i>	66.
<i>Quomodo aer ignem &amp; flammam fovet.</i>	68.
<i>An nitrum aereum verè agat in sanguinem re- spirantium.</i>	72.
<i>Nitri aerei fixa natura.</i>	ibid.
<i>Aer ipse rarefacit sanguinem &amp; quomodo.</i>	73.
<i>Nitrum aeris non confert generande flammæ.</i>	75.
<i>De Antrorum subterraneorum mixta mate- ria.</i>	77.
<i>Quare opifices in mineris successu temporis varios morbos corripunt.</i>	78.
<i>Modus quo præveniri possunt morbi in fodinis.</i>	80.

F I N I S.



# CONTENTORUM

44.	De virtutibus opum.
46.	De virtutibus opum.
48.	De virtutibus opum.
50.	De virtutibus opum.
52.	De virtutibus opum.
54.	De virtutibus opum.
56.	De virtutibus opum.
58.	De virtutibus opum.
60.	De virtutibus opum.
62.	De virtutibus opum.
64.	De virtutibus opum.
66.	De virtutibus opum.
68.	De virtutibus opum.
70.	De virtutibus opum.
72.	De virtutibus opum.
74.	De virtutibus opum.
76.	De virtutibus opum.
78.	De virtutibus opum.
80.	De virtutibus opum.

## *Errores Typographici.*

**I**N toto hujus Codicis decursu occurrentia hic inde Errata Lector pro benevolo dignetur judicio emendare. Ubi sententiam *Commata* inclusam videbit, ibi *Colon* vel *Semicolon* aliquando intelliget. Ubi *Colon* vel *Semicolon* reperiet, ea *Periodi* locum nonnunquam usurpasse existimet. Et pag. 25. lin. 16 pro nonnunquam legat nunquam. Pag. 41. lin. 8 pro *nationem* legat *rationem* pag. 71. *concarvatis* legat *concarvitas* &c.